

KUKUNA MWONJI WA MVINYO

NÈ MWABA WA KUWUKUNYINA

 Tudi nè bintu byàbúngì be, kàdi Wèwè udi mumanyè bulelèlà mwoyi wètù nè mumanyè byònsò bitùdi naabi dikèngela. Tudi nè disànkà dyàbúngì dyà mutùdi mwà kuKutwàdilabì mu disambila, bamanyè nè Wèwè udi umvwa nè neütüpèshè bwímpè Bwèbè; kí nnè tudì bacikumbànyine to, kàdi bwalu Wèwè ngudi mutùlayèci. Ndi mutwishiiibwe nè kùdi malòmba àbúngì mu èkèleeziyà mu dindà emu, bwà mabèèdì nè bàdi mu lukèngelu. Nènku tudì baswè kuKutwàdilawù nè didipwekesha dyònsò mpindyewu mene, tulòmba luse Lwèbè lujaalàme nè bukolè bwà dyondopa, bwà yònsò wa kùdibo.

² Tudi kàbìdì tusambila bwà bàdi munkaci mwà kusangala nè aba bàdi kabàyi mwà kuya ku èkèleeziyà mu dindà emu. Kàbìdì, bwà bààbúngì bàdi badisangishe kaaba aka mpindyewu. Bààbúngì bàdi bàsaama nè biikàle mu lukèngelu. Tudi tubàmòna nè mabaya à balèmà nè mu tùkalù, nè tùkalù twà balèmà, nè bàdi—bàdi dijinga nè luse Lwèbè. Tudi tulòmba, Mukalenge, bwà Ûbènzèlèci, byà biyiila nè panshì. Swàkù bwà bàpatukè mwab'ewu, bènda bàcyònkómoka, bòndopiibwè nè bàsangalè. Bààbúngì bàdi kabàyi bàleeja ntàtù yàbò to, kàdi, nànsha nànkù, pàmwàpa disaamà dyà mwoyi dìdì ànu dyàmba kubàngata, anyì kànsèrè, anyì démon kampàndà wa ùkwàcisha bwòwà. Tudi tulòmba, Mukalenge, bwà yèyè kuumushiibwa mu dindà emu. Nebàpatukè mwab'ewu, nè disànkà, basàngalè.

³ Tudi bafwànyine kuvùluka mwànà mukesè wa balùme udi—udi upùnga nè lufù awu. Báfumu ku ditwambila, kùdi munanga kampàndà, udi nè kànsèrè nè mufwànyine kufwà leelù, luse Lwèbè lwólò kalùyì lwalàbàjiibwe pa mwànà awu. Èyì Mukalenge Nzambì, ikàlàku nè luse kùdi mwànà mukesè wa balùme awu. Musùngilekù, Mukalenge; piikalàbi nànkù awu mu diswa Dyèbè dyà Bunzambì. Tudi nè disànkà dyàbúngì bwà bujaadiki bwèndè, bwà nè yèyè mmwitàbe Mashi Èbè, mu mùshindù wà nè wàkalòmba tatwèndè bwà kumujiikayè mulwàte bilàmbà bikúnze, bwà bààmònakù mwà kumanya nè ùvwa mubwikila kùdi Mashi. Tudi tuKusàkidila, Mukalenge, bwà diitabuuja dyà bukitù bu nànkù dyà bilòbo bikesè, byènda bitàngile kumpàlà bwà kutuutakeena nè ndekeelu wa mwoyi, buupùkile nkùrusè mu myoyi yàbò, nè kwine aku bàleeja cimanyinu cyà Mashi. Bu byòbikù mwà kwenzeka, Mukalenge, lamàku mwànà mukesè wa kambodyoto awu, swàkù bwà ikalè nè mwoyi. Tudi balòmbè bwà bakwàbò.

4 Nè pashìishe, Mukalenge, tudi tulòmba bwà masangisha à mu dindà emu. Kùdì bàmwè kaaba aka, pàmwàpa, bàdì kabàyi baKumanyè bu Musùngidi wabò to. Byòbì biikàlè nànkù, swàkù bwà edi diikale ditùkù dyàKusanganàbo wa musinga mukolè bwà nsòmbelu wabò, bu Musùngidi. Aba bàdì dijinga nè dyondopiibwa abu, bàKupetèku bu Mwondopi. Mukalenge, swàkù bwà Ùlwe kùdì musadidi Webè, mu dindà emu. Swàkukù bwà nkupetè Wèwè bu Muiyishi. Bwalu, tudi tuKulàmbula byònsò ebi, tulòmba bwà Wèwè kwandamuna mu Dìna dyà Mukalenge Yesù. Amen.

5 Tudi misangu yònsò ànu nè disànkà dyà kubwela mu nzùbu wa Mukalenge, nè ku Disangisha dyà Bânàbutè. Nènku mvwa, bu pa ciibidilu, ànu mu lujòòkò. Ncìvwa ngèla meeji nè mvwa nè cyà kufika mwab'ewu to, ànu bu mèmè mwà kulomba bapìci bàà nè màshinyi bwà kungambulabò. Eci's necìsekeshekù mukàjàànyì menemene. Mmusòmbè kaaba aka, mwaba kampàndà. Ùvwa muumùke mu dindà emu, nènku mvwa nsanganyibwa mu nzùbu wa mwînshì mwà buloba munkaci mwà kulonga. Ke yèyè nè: "Ndi nè nsapi, Billy." Ke mèmè kufika ku dijandula nè, yèyè nguvwa nè nsapi yà ku citèekedi cyà màshinyi, kàbidi. Ncìvwa nè mùshindù wà kubwela to. Mvwa mupicile mu cikondo cyà bwalu bukolè.

6 Kàdì paanyimà pàà katanci, pàbèngi Billy kummòna, ke kwambayè nè: "Ndi ndikonka nè mbwà cinyi yèyè kí mmwanji kulwa." Ke kumbiikilayè.

7 Mèmè nè: "Lwàkù lùkàsà menemene." Mèmè nè: "Bwalu ncyèna nè mùshindù wà kulwa mu èkèleeziyà to." Pa nànkù tudi. . . Ndi nè disànkà dyà kwikala kaaba aka. Pa nànkù, ndi mufikè nè lujòòkò.

8 Kàdì, nudi bamanyè's, patùdì tubwela mu cipaapu ckwabò aci, mùdì cikondo kaciciyikù kàbidi to, tudi tubanga kupwà mwoyi bwalu bwà dîbà. Byònsò abi bìdì bìbwelakanangana mu Cyendèlèlèlè, nè kakùciyi kàbidi cikondo to. Kakùcyena kàbidi mikalù yà cikondo to.

9 Pòlò ùvwa nè cyà kwikala nè cintu kampàndà cyà mùshindù awu mu meeji èndè, dilòòlò dyàkayiishàye bufùki bujimà abu. Mwànà wa balùme kampàndà kukùlukayè ku nzùbu aku nè kufwàye. Ke Pòlò kwadijayè mubidi wèndè pambidi pàà mwànà wa balùme awu, ke mwoyi kwalukilawù cyàkàbidi kùdì mwànà wa kambodyoto awu.

10 Ngèla meeji nè mbangambile, kùdì mpaasàtà, ànu mpindyewu ewu nè, bàdì nè mwànà mukesè wa mu dibòko udibò baswè kulàmbula mu dindà emu. Pa nànkù bu maamù mwà kutwàla mwànà mukesè awu, mpindyewu mene, netùmulàmbulè Mukalenge, ní ngwa balùme ní ngwa bakàji, cyònsò cidiye mwà kwikala aci. Nènku ntu ànu bu muswèku midimu yà dilàmbula

ayi. Udikù mwà kuseemena kumpalà eku anyi, Mwanèètù Neville?

¹¹ Wetwàwu, mwanèètù wa bakàji. Dyà mwànà mukesè awu nganyi? [Mwanèètù wa bakàji ùdi wàmba nè: “Frank Wayne Dabney.”—Muf.] Frank Wayne Dabney. Kwèna bulongo nè Robert Dabney to, mmwòmò anyi? Frank Wayne Dabney, ùdi nè bidimu búngì munyi? [“Mbingu mwandamukùlù.”] Mbingu mwandamukùlù. Kí mmwànji kwenza ntàntà mule mu buloba bwà cikisu ebu to. Èè, yèyè’s ke mamuma è disangila dyènù. Nè mpindyewu udi muswe kumulàmbula Nzambi, bwà wàmòna mwà kwikala musadidi Wendè. Ncyà bushùwà anyi, mwanèètù wa bakàji? Nzambi àkubènèshè.

¹² Èè, ndi mwambùle bubanji bukesè mwab’ewu, mulenga wa dikèmà. Anji mutàngilaayibi’s, Frank Dabney mukesè awu.

Tùsambilàayi.

¹³ Taatù wa mu Dyulu munanga, mu matùkù à lwendu Lwèbè pa buloba apa, mu mmwènèkelu wa muntu, uvwa ubiikidiibwa nè Mukalenge Yesù, bàakakutwàdila bânà bakesè. Nè Wèwè wàkabàtentekela byanza nè kubàbènesha, nè kwamba nè: “Lekèlaayi bânà bakesè bàlwe kùNdi, nè kanùbàkàndiki to, bwalu Bukalenge mbwà bàdi bu bóbò aba.” Maamù ewu nyèwù ùfla mu mabòkò àànyì, mu dindà emu, mwànà mukesè wa balùme ewu, ùndi nKulàmbula ewu. Ndi ndòmba, Mukalenge, bwà Wèwè kubèneshakù mwànà mukesè ewu. Bènesàku dikù dyèndè. Swàkù bwà àkoleshiibwè mu dikù dyà beena Kilistò. Swàkù bwà àkoleshiibwè, mu mibelu yà Nzambi. Nèku kwòkò kwikale màalaba, àyiishèku Èvànjeeliyò ewu pìikalàbi bilongolola nàнку Kùdi. Mupèèshèku mwoyi mule, nè mubidi tumatuma. Bènesàku baledi bèndè. Swàkù bwà cintu cimpè cyònsò cyŪdi mulayè aci, cìlwe pa mwànà mukesè wa balùme ewu. Maamù ngudi mumulàmbùle mu byanza byètù, bu bakùlù bàà èkèleeziyà. Nè mpindyewu twètù tudi tumulàmbula Kùdi. Mu Dìna dyà Yesù Kilistò, swàkù bwà Wèwè kubènesha mwànà ewu. Amen.

Nzambi àkubènèshè, wèwè mwànà mukesè Frank. Ngèèla meeji nè mmulenga wa dikèmà’s!

¹⁴ Mwà nè cyà kuyisambidila pàndi mu dilaabiibwa...?... Tudi nè ndambù wa mìshwâlà kaaba aka yà kusambidila, kàdi mbipiciibwe nè mèmè mwenze nàнку paanyimà pàà twètù bamanè kubanga kusambidila babèèdi, nè dilaabiibwa bwà mudimu dilwè. Dìbà adi’s tudi bafwànyine kwikala bimpè bu twètù mwà kuyisambidila dìbà adi.

¹⁵ Ndi nè disànkà bwà kumòna bààbúngì bàà ku balundà bàànyì kaaba aka. Ngèèla meeji nè ndi mmòna Mwanèètù Charlie Cox lwà paanyimà pààpa mu disangisha emu. Nè ndi kàbìdi mmòna Mwanèètù John O’Bannon, wa ku Louisville. Nè balundà bakwàbò bààbúngì, eku nè eku, bàndi—bàndi

njingulula's. Nè pa nàнку tуди nè disànkà dyà kwikalakù neenù kaaba aka, badisangishe pàmwè neetù mu dindà emu, bwà kusadila Mukalenge.

¹⁶ Mpindyewu tуди nè mwoyi wùzùka, paanyimà pàà katanci, bwà kubanga ditàbuluja kaaba aka bwà ndambù wa matùkù. Tуди munkaci mwà kusambila bwà bwalu abu. Ndi ndyùmvwa nè Nzambi Yèyè kàyì mutwàle ditàbuluja, anyì muditèèke pa mwoyi wètù to, dībà adi ditàbuluja adi ndiditàcisha dyètù twètù nkààyetù. Nè pashìishe twètù bindile, nè Yèyè mumvwe nè dībà dyākànyì dyà ditàbuluja, dībà adi Yèyè ùdi ùtèèka aci pa mwoyi wètù, pashìishe tуди tudyùmvwa bwà kwenza ditàbuluja adi.

¹⁷ Mulundà mukwàbò udi musòmbè kaaba aka ewu, tatwèndè nè mamwèndè wa Mwanèètù Wood, nè umwe wa ku balubuludi bèètù mu èkèleeziyà emu. Tуди nè disànkà dyà kwikalakù naabò mu dindà emu.

¹⁸ Nèнку mu dipweka dyà nè mùsèèsù, makèèlèlà awu, muntu kampàndà uvwa musòmbèle münwemu mu cimenga emu, uvwa memene mwàna mukesè, wa mukàyàbàle, nè mvwa misangu yònsò ànu mumuswè, nèнку's n'nsongààlùmè mwìmpè. Nè mukàjàànyì ùvwa musòmbèle pabwìpi naabò. Nè yèyè ùvwa mwenzè bu mwimbi wa misambu, nè mwimbi wa mìjiki. Nè ùvwa nè ciibidilu cyà kusòmbela lwà kwàka nè ùtuuta dikàsà dyèndè panshi, mwàse cifulu cinène cyà cowboy ku mutù, nè wimba cisanji cyà mìjiki. Kàdi ùvwa ùkwàta mudimu ku WPA. Kàdi dīngà ditùkù cintu kampàndà kwenzekaci, citù misangu yònsò ànu cimvulwija, anyì cilama mu meeji àànyì's we, èyowà, kukaadi ntàntà mule. Kacya kacitukù cyànji kuumuka to. Ùvwa nè bānà bakesè bààbūngi; nè mukàji mulenga kumòna. Bāvwa bapèlè ànu bèètù bàà bālāka pa mabwe aba, ànu mutùdi twètù bònsò aba emu.

¹⁹ Ke mèmè kumòna, mwimàne pa cibàndilu, mwèle mulongo, mwindile bwà shekè wa WPA kulwayè. Mutwàdidyanganyi wa mikàndà mifundilangana kulwayè wènda ùbànda nè mùsèèsù. Bāvwa nè disànkà dyàbūngi. Ditùkù dyàkalondà divwa m'Paasàkà. Bāvwa nè cyà kupeta ndambù wa mbòmbò yà Paasàkà anyì cintu kampàndà, pāvwa shekè wa papa ùfika. Nèнку pààkalwa mutwàdidyanganyi wa mikàndà mifundilangana awu, kāvwa nè shekè wa papa to. Nudi numòna mmwènekeli wa dyediibwa dyà mājì ku makàsà awu kwìsù kwà bānà bakesè abu, nè divwa misangu yònsò ànu dindamàte, dyediibwa dyà mājì ku makàsà dyà dikèma.

²⁰ Mèmè kuupanga kumòna muntu awu, kùkaadi bidimu. Kàdi makèèlèlà awu, ngènda mpweka nè mùsèèsù, pāmvwà. . . Mukàjàànyì nè mèmè tuvwa twenda tupàtuka mu makàjiinyì à byākudyà, anyì mu Quaker Maid mu ville mwāmwa, nganyì ùmvwà mutuutàkèene nendè, cimònààmèèsù, piikalāye ní kī n'yèyè awu's? Nèнку cimwè cyà ku bintu byà kumpālā bìvwāye

muswè kungambila ncyà nè, yéyè ùvwa mulwè mwena Kilistò. Kàvwa kàbidi ùnwa maalà to kùkaavwa bidimu. Nènku ndi nè disànkà dyà kwikalakù neebè, Mukalenge Logston, musòmbe pa nkwasà wa kumpàlà ewu, mu èkèleeziyà emu, mu dindà emu. Yéyè's ncidimba cyà èkèleeziyà wa Mwanèètù Junior Cash ku Charlestown, mu Indiana, mwanèètù mulenga be. Mbímpè be bwà kwikala mwena Kilistò kutàmba mùdibi kuntu kwàka mu maalù à pa buloba, kî mmwòmò anyi? Mpindyewu, ndi ngèèla meejì nè ùdi wimba misambu mu ndongamu, nè wimba mijiki yèndè, bwà butùmbi bwà Mukalenge. Ànu cikwàbò cileejì cyà bucìmunyi cyà ngàsà udi ukèmesha wa Nzambi.

²¹ Udikù ànu mwà kujuukila kuulu anyi, Mukalenge Logston? Ncyèna... Muntu ewu ùvwa musangu kampàndà mukwàciki wa maalà. Umwe wa ku bimbi bàà dipòkò bàà misambu yà bikàsa, nudi bamanyè's, bindaala nè bikwàbò. Mpindyewu byònsò mbikùdimuna bwà Bukalenge bwà Nzambi, nè nyéyè ewu mwab'ewu, wàmba nè: "Twasàkidila, bwà bwalu abu, Mukalenge." Kaa, pàvwà...

²² Mwva ndondela Mukalenge Wood, makèèlèlè awu. Mémè nè: "Panùdi wèwè nè maman, nufika ku luseke lukwàbò lwàlwa nè nupeta nzùbu wenù awu, nè mu dindà kampàndà panwikalà nè disànkà dyà menemene, nè lwà kwìnshì dishiyà dyà tukùnà atu, nè mu lupòngò kampàndà, mwaba kampàndà, mùdi kazùbù kakesè kampàndà kiibakamù, pangààpàtukà mu lutanda, nè mpàtuka kuntwaku nè ngùimana mu lutanda, nengeelè lubilà mu mpòngò mwònsò amu nè:

Ngàsà udi ukèmesha! dìyì dipòle kaayi's,
Dyàkasùngila mukèngeledi wa luse bu mémè
kùnù's!
Musangu kampàndà mvwa mujìmine, kàdi
mpindyewu ngàpetèki,
Mvwa mpofo, kàdi mpindyewu nkààdi mmòna.

²³ Mémè kwambila Mukalenge Wood, mémè nè: "Èè, tuutàku maman cyanza pa dikaaya, wamba nè: 'Nzambi àtumbè! Mwanèètù mununu Branham mmufikè. Nyéyè wàwa, kwìnshì kwàka mu kazùbù kèndè kakesè aku.'" Bu mémè mwà kufikaKù, neciikalè ku ngàsà udi ukèmesha wa Mukalenge Yesù.

²⁴ Mpindyewu tudikù mwà kwinyikakù mitù yètù bwà katanci kakesè cyanààna kumpàlà kwà kubuulula Dìyì.

²⁵ Mukalenge tudi cintu kampàndà bu mùdi musùmbà wà bàna bakesè. Tudi nè mmwènekèlù yètù yà buntu, nènku, twètù, ngiikàdìlù yètù yà dyela dyà mapikù, bwobùmwe bwètù pàmwe. Mpindyewu tudi tulwa ku citùpà citàmbe cijila cyà disangisha kanà dyònsò edi, bwà kubala Dìyì dyà Nzambi udi nè mwoyi didì kadiyì mwà kupangila adi. Ndi mwà kulòmba, Mukalenge, bwà Wèwè kwakula nè Dìyì dyònsò. Swàkukù bwà dipàtuke nè ditùkinè mu myoyi yà bantu, nè ditwalè dinowa bwà cyònsò

cìvwaDi dilongolwela aci. Swâkù bwà Nyumà Mwîmpè munène awu àlwe munkaci mwètù mpindyewu, nè àngatè Mèyi ikalà mwà kubadiibwa aa, nè àtwabànyìneWù, ku ciibûngì, mutùdì naawù dijinga amu. Bwalu tudi tulòmba nùnkù mu Dîná dyà Yesù nè bwà bwalu Bwèndè. Amen.

²⁶ Mu Musambu wa 80, ndi njinga kubala citùpà.

Mpèèshè macì, Wèwè Mulami wa mikòòkò wa Izalèlèlè, wèwè ùdì ulombola Yòzefù bu cisùmbù cyà mikòòkò; wèwè...udi musòmbèle munkaci mwà bakèlùbà, ùkenkè.

Kumpàlà kwà Efàlàyimà... Benyàmìnà nè Maanàsè bindululà dikàndà dyèbè, nè lwàkù ùtùsùngilè.

Twalùje kàbìdì, Éyi Nzambì, ...kenkèshà mpàla webè; nènku netùsùngidiibwè.

Éyi MUKALENGE Nzambì wa bilwilu, too nè dîbà kaayi diwàkwàcìlà masambila à cisàmbà cyèbè ciiji?

Ngwèwè awu ubàdùsha dyàmpà dyà binsònji; nè ubànùsha binsònji mu cipiminu cinène.

Ngwèwè awu utùvwija cyena bwalu cyà matàndu kùdì mwena mutumba neetù: nè beena lukunà bèètù bàtùseka munkaci mwàbò.

Twalùje kàbìdì, Éyi Nzambì wa bilwilu, ...kenkèshà mpàla webè; nènku netùsùngidiibwè.

Wèwè udi mupatule mwonji wà mvinyò mu Èjiipitu: udi mwipate bampàngaanù, nè muwùkùne.

²⁷ Cyena-bwalu cyànyì mu dindà emu, bu Mukalenge mwà kucyànyisha, bwà katançi kakesè cyanààná, neciikàle pa: *Kukùna Mwonji Wà Mvinyò Nè Mwaba Wà KuWùkùnyina.*

²⁸ Mbyà bikèmesha mùdì Nzambì, mu myaba yàbûngì, ùleeja bantu Bèndè mu mishindù mishiilèshìilàngàne. Ànu àbìdì àdì panshì aa tuvwa twakula mwaba wùvwàYe mutùleeje bu mukankù, nè Yèyè bu Mukanku Yèyè mwine, nè twètù tudi twànà Twèndè twà mikanku. Nènku ndi nè dyeyemena dyà nè bintu byònsò nebyènzeke mu mùshindù mujaalàme. Musangu mushààle wùmvwà mwakule pa cyòcì aci, mvwa mupetè mukàndà mumfùndila mùdì... Cimenga cinène aci, bààbûngì bàà kunùdì mbamanyè mwaba wùvwàci, mu Ohio, nsangilu wa bambi wàkadisangisha pàmwe nè kupiisha masangisha àànyì bwalu ndi ngiitabuuja nè Nzambì ùtu mubiikile muntu ku Mwoyi wà Cyendèlèlèlè kumpàlà kwà difùkà dyà dyulu nè buloba. Nènku ku dyànyì diitabuuja, piikalàbì nè Nzambì ùdì Nzambì, kacya ní ùvwakù Nzambì, Yèyè ùcidi ànu Nzambì, nè ùvwà misangu yònsò ànu Nzambì. Yèyè kàyì mummanyè kumpàlà kwà dyulu nè buloba kwikalàbiku to, dîbà adi Yèyè kí n'Nzambì to.

29 Bààbúngì bàà kunùdì bàdì munkaci mwà kubala mwaba ewu mu císalu cinène cyà mbilu, nè bikwàbò, pa mmwènenu wa ndongelu wa dyumvwa. Nè bimwè byà ku byòbì abi bìdì, mu bushùwà bwà bwalu, byàlukila bwà kulwisha mudimu wànyì wà bwambi. Kàdì, pawikalàku mulonge anyì mupete mùshindù nànsha ùmwè wà dilonga dyà maalu mafwikakaja, maalu makwàtakaja nè: “cintu kampàndà cìdì cìmwèka bu nè ncyòci, kàdì kaciyì cyòci to.”

30 Kàdì mu Mifundu, tudi tusangana nè Yambèlè nè Yanè bààkakàndameena Mòsà mu kwamba kwenza kwà cintu cìmwècìmwè cyàkenzàbo aci, mu kwela kwà dikombo panshi nè kwandamukadi nyòka. Mòsà wàkabìikila bipùpù. Nè bàvwa mwà kubìikila bipùpù, bòbò pààbò, kàdì kabàvwa mwà kuumusha bipùpù to. Kabàvwa mwà kwondopa to, bwalu Nzambi ke mwondopi umwèpelè. Kàdì bàvwa mwà kufikisha bipùpù ku dilwa, pashìishe Mòsà kubyùmushayè. Pashìishe diteetangana dyà makàndà dyà ndekeelu kulwadi, pàvwà Mòsà mwenzè ànu mùvwà Nzambi mumwambile bwà kwenza amu.

31 Nènku ndi mumanyè nè, byònsò bìdiku, pa buloba leelù ewu ebi, nebikafikè ndekeelu wa byònsò ku diteetangana dinène dyà makàndà dīngà ditùkù. Bwalu, Bible mmwàmbè nè: “Ànu mùvwà Yanè nè Yambèlè bakàndàmèène Mòsà amu, ke mwikalà bantu bàà meeji moonèke, pa bìdì bìtàngila Diitabuuja, mwà kukàndameena mu matùkù à ndekeelu, kàdì dikùtakana dyàbò nedìmwèneshiibwe.” Nciprofeta cìdì nè cyà kuula, nè nudi mwà kumòna nseke yònsò yìbìdì yìjuuka mpindyewu.

32 Kàdì Mòsà wàkenza ànu menemene cyàkamwambilà Nzambi bwà kwenza. Wàkeela dikombo adi panshi nè kwandamukadi nyòka. Ke beena mikendi aba kupàtùkabò nè kwelabò makombo àbò panshi nè kwandamukawù nyòka. Mòsà ùkaavwa ku ndekeelu kwà lungènyì lwèndè, nè ku ndekeelu kwà dikàndà dyèndè.

33 Kàdì mwómò amu ke mùdì Nzambi muswè kutùfikisha, ànu ku ndekeelu kwà njila wetù, dībà adi Yèyè kubwelamù. Bìdì ànu mùyaakwenzaYè. Pàmwāpa udi usaama bikolè, mu dīndà emu, mu mùshindù wà nè ngàngàbukà wàmba nè kwèna mwà kwikala nè mwoyi to. Muntu munkaci mwà kutùkina mu mǎyì nèàkwatè ku bisoosà. Ke mùshindù awu patùdì tuteeta bwà kupeta... Byònsò bitùdì mwà kukwàta naabì mudimu, twètù biinè, mu mùshindù wà buntu, netùbyenzè. Kàdì pàkaadibì bikafika ku nè kakùcyèna dikwàbò ditèkemena to, aba bàdì kabàyi bìitabuuja dyondopa dyà kùdì Nzambi nebìitabuuje ànu dībà adi mene. Ke ditèkemena dyàbò dīmwpelè ndyòdì adi.

34 Nènku Mòsà ùkaavwa mushiikile, pashìishe ke Nzambi kubwela nè kwenza nè nyòka wèndè awu àdye nyòka wa muntu mukwàbò awu. Pashìishe nyòka wèndè kàcivwakù kàbìdì to.

³⁵ Mpindyewu, mu mmwènenenu mutàmbe cyumvwilu, nè mu maalu mafwikakaja, nè beena lubùku bònsò, ngànji ànu, kumpàlà kwà mèmè kubanga cyena-bwalu cyànyì, nnùjaalàmijè nwènù biinè mu cyòci eci, ku dikwàcisha dyà Nzambi, mèmè nè mùshindù, dyabùlù ùdi mwà kwenza nè bintu bimwenekè bijaalàme, kàdi misangu yònsò bitu ànu bijaadikiibwa nè kî mbijaalàme to. Mpindyewu, kacya kabàtùkù banji kukumbana mwà kukwàta nànsha umwe wa ku nyumà yìdì yìmwènèka eyi fòtò to, bwalu ncyà bushùwà nè yòyi kayènamù to.

³⁶ Kàdi pààkalwà dībà bwà Nzambi kujaadikila maalu à mamanya nè, Ùvwa Nzambi, wàkanyisha bwà kukwàtabò fòtò. Cidi cishààla kashidi. Mukenkeci wàkamba nè: “Bukènkè mbutuute lumwènù lwà tulòndò. Bukènkè bùvwa mwaba awu mu bushùwà bwà bwalu. Kacivwa cintu cyà mu meeji to.” Pa nànkù, nudi numòna’s, cidi Nzambi wènza cidi cishààla kashidi.

³⁷ Nyòka wa Mòsà wàkasùkumina nyòka wa bakwàbò abu. Nènku ùvwa mwà kumwambula mu cyanza cyèndè, kàdi nyòka wabò ùvwa munda mwà dikombo adi. Cidi dyabùlù wènza mbwalu bufwikakaja. Cidi Nzambi wènza ncyà bushùwà. Ki bwà cinyi, ndi muswè bwà eci cipwekè too nè mu ndòndò mu myoyi. Pàdi Nzambi ùsùngila muntu, yèyè mmusùngidiibwe. Kùditàcishi bwà dyalukila paanyimà nànsha; kwèna mwà kwalukila to. Cidi Nzambi wènza ncyà Cyendèlèlèlè. Dyabùlù ùdi mwà kukusalula nè kukufikisha ku diitabuuja nè udi musùngidiibwe. Kàdi pàdi Nzambi ùkusùngila bulelèlè, udi naaci mu ntàntà yònsò udikù kashidi awu, bwalu udi nè Mwoyi wà Cyendèlèlèlè. Yesù ngwakamba nànkù’s.

³⁸ “Ewu udi utèeleja Méyì Àànyì, nè wìtabuuja Yèyè udi muNtùme awu ùdi nè Mwoyi wà Cyendèlèlèlè, nè yèyè kààdyàkupìcilakù ku Cilumbulwidi to, kàdi wàmányì kuumuka ku lufù muyè ku Mwoyi.” Aci’s ncyà Cyendèlèlèlè ànu mùdì Nzambi Yèyè mwinè amu, bwalu n’Dìyì Dyèndè.

³⁹ Nzambi udi Nzambi umwèpelè. Yèyè kèna mwà kuDisambakaja nè bikwàbò bintu to, Yèyè ngwa kàyi ùpanduludiibwa nànsha. Nzambi ùdi Nzambi. Dìyì ditùma dyà kumpàlà, didi nè: “Kwikadi nè nzambi mikwàbò kumpàlà Kwànyì nànsha.”

⁴⁰ Pa nànkù kwèna mwà kusambakaja maanyì nè mâyì nè kwenza bwà kukùmbananganabì to. Cidi nè cyà kwikala anyì mâyì anyì maanyì. Nè Nzambi ùcidi ànu Nzambi umweumwe awu. Tudi nè ntèdeleelu udi usambakaja wàmba nè: “Nzambi wàkadi, musangu kampàndà wàkenza *cikampàndà*, kàdi kèna ùcyenza leelù ewu to,” dībà adi tudì tuteeta bwà kusambakaja maanyì nè mâyì pàmwè. Bwalu, Yèyè. . .

⁴¹ Mufùndù mmwàmbè nè: “Yèyè ùdi umwèumwè awu makèlèlèlè, leelù, too nè kashidi.” Kadyàkusambakanakù nè bupidyà to; diitabuuja’s.

⁴² Tudi nè diitabuuja mu Nzambi. Ndyà Cyendèlèlè. Bupidyà bùtu ànukù misangu yònsò, kacya ku budimi bwà Edènà. Nzambi ùtu misangu yònsò ànu muswè bwà bantu Bèndè kwitabuujabò cyôci eci. Ûvwa muswè bwà kwikalabò nè dyeyemena, nè bwà—bwà kuDileeja munkaci mwà bantu Bèndè. Nzambi ùdi Nyumà.

⁴³ Mu Yone Munsantu nshapità wa 15, mvensà 1, Yesù wákamba nè: “Mémè ndi Mwonji wà mvinyò; nwénù nudi matàmbà.” Mpindyewu, ditàmbà nè Mwonji wà mvinyò mbilamàkàne pàmwè. Nè Nzambi ùtu misangu yònsò ànu ùteeta bwà kupeta bantu bàvwàYe mwà kusòmbelamù, bwà Wàmòna mwà kuleeja butùmbi Bwèndè munkaci mwà bantu Bèndè.

⁴⁴ Pa nàнку tudi tubala kaaba aka nè Davidi wàkeela lubilà lukolè, nè kwamba nè: “Éyì Mukalenge Nzambi, alùkilaaku cyàkàbidi kutùdi. Tudi benzè mpèkaatù nè bayè kule Neebè. Wèwè Udi musòmbèle pankaci pàa cyoshelu nè mukèlùbà, ùkenkè cyàkàbidi.” Bwalu yèyè ùvwa mumanyè nè musangu kampàndà Yèyè ùvwa Nzambi munkaci mwàbò, nè Davidi ùvwa mumanyè nè Yèyè ùcìvwa ànu Nzambi. Bantu bàvwa batàpùlùke Nèndè. Nzambi kàcìvwa kàbidi ùkenka to. Kabìvwa nè mbwalu Yèyè kàvwa mwà kukenka to. Mbwalu bantu mbadikàngile kule nè luse Lwèndè lujaalàme, ku mpèkaatù wabò. Dìbà adi Davidi ùdi ùya ku cyena-bwalu cyètù. Misambu 80.7.

⁴⁵ Yèyè nè: “Wèwè kujoomona mwonji wà mvinyò, mu Èjiipitù, nè wèwè kuwùpatula nè kuwùkùna mu mwaba mwímpè.” Awu’s ùvwa ny’Izàlèlèlè, cisàmbà cyà Nzambi cìvwa mu Èjiipitù aci. Bàvwa mwonji wà mvinyò mwímpè. Bàvwa basungula bàà Nzambi. Kàdi mwonji wà mvinyò mwímpè wòwò kawùyi mutèeka mu buloba bwímpè to, kawàkukwàma mamuma mímpè nànsha. Mbilondèshile ku mwaba wùdi mwonji wà mvinyò mukùnyìbwe, ke wàleeja bipeta byà dinowa. Pa nàнку, Nzambi wàkambula Izàlèlèlè, mu buloba bwatùke.

⁴⁶ Ncintu kampàndà bu mùdi leelù ewu. Mu ditùnga emu, tudi nè beena kwitabuuja banène bààbùngì nè bàà maalu mímpè, kàdi’s mbasambàkàne mu èkèleeziyà yònsò yà cyena-màngumba eyi. Mbafùmìne mu mòngumba mashiilèshìilàngàne nè myaba mishiilèshìilàngàne yà mu nsòmbelu. Ke bwà cinyi, mu mudimu wànyì wà bwambi, ncitukù mwànji kuteeta to, musangu nànsha wùmwè, bwà kudyombola muntu kampàndà anyì dìngumba kampàndà to, bwalu, mu ònsò awu, mùdi bantu bímpè. Mbantu babìikila nè basungula bàà Nzambi.

⁴⁷ Wèwè uvwakù mufwànyine kwikala mupìishe Izàlèlèlè pàvwàye mu Èjiipitù apu anyì? Bòbò’s bààkapàtuka ànu mu dikàsà dibì. Nè mpèkaatù yàbò yàkabàtápulula nè—nè Nzambi, nè bàvwa bakùnyìbwe mu Èjiipitù.

⁴⁸ Mùshindù awu ke wùdi bantu bààbùngì, mu maèkèleeziyà leelù ewu, bantu bîmpè bakùna ànu mu mwaba mubì. Mpindyewu mwena kwitabuuja mulelèlè yêyè mutwàla kùdì Kilistò, kàdi mukùnyìibwe mu dîngumba kampàndà dinène didì kadiyì dîitabuuja bishimà nè bîmanyinu nè maalù à kukèma byà Mukalenge, muntu awu ùdi mwà kwikala mwena Kilistò mushùwashùwàle, nè mwena Kàtòlikè, Baptiste, Presbytérien, Ntèmu wa Yèhowàh, cintu kampàndà cikwàbò. Mu èkèleeziyà awu, Mwonjì wà mvinyò mushùwashùwàle wà Nzambì, kàdi twitabàayi wa cyena màngumba ùdi ùkòsa Mwoyi wà Mwonjì wà mvinyò awu. Kawèna mwà kukwàma mamuma Àwù to.

⁴⁹ Nènku, pa ciibidilu, mamuma aùdi upòòla ku mwonjì wà mvinyò wùdi mushawùke anyì kawùyi mu buloba bwîmpè mmamuma mabì. Neàpàtuke bu pomme, kàdi neànyanè nè àdiikè kùdì bishì. Àdi àshàala à bîshi byònsò bibunda.

⁵⁰ Mwonjì wà mvinyò mwîmpè nè mubidi tumatuma kawèna nànsha wùkèngela bwà kuwùpwidijila manga to. Ùdi nè bukolè bwà mubidi bukùmbàne bwà kwipata beena lukunà bàwù bònsò.

⁵¹ Ke mùdibi kàbìdì nè mwena Kilistò mulediibwe cyàkàbìdì. Kabyèna bikukèngela bwà kwikala kubàpwidijila manga dîbà dyònsò nànsha, nè kubàtuuta byanza pa makaaya to. Bàdi nè mubidi tumatuma mukùmbàne wà mu nyumà bwà kutàpuluka nè cilèndwishì cyònsò cyà pa buloba. Bàdi nè mwoyi ku cidìishì cilelèlè.

⁵² Mucì misangu mikwàbò, bwà... anyì cikùnyìibwa cìdì mu myaba yà cipèèlè, kàdi kaciyì cipeta citaleela cikùmbàne bwà kucikwàcisha, necikwame mamuma makesè manyàne, nè kabyàkumwèka bu mamuma àvwà nè cyà kupàtukila ku mwonjì wà mvinyò awu to.

⁵³ Mwanèètù wa balùme, mwanèètù wa bakàjì, ke bwalu bùdiku kùdì maèkèleeziyà leelù ewu abu. Ngènzàmpèkààtù ùdi ùbwela, paanyimà, pàmwàpa, ùya kumbèlu mutwishìibwe, ùya ùkabala Bible wendè, nè ùya ku èkèleeziyà. Pamutù pàa kupeta bimuma binènè byà pommes anyì byà tumuma twà mvinyò, Mwoyi wà Mukalenge Yesù munkaci mwà kuvulangana mu Èkèleeziyà, ùdi ùsangana tuumeeji tucimbàkàne tukesè, tunyàne, tudyà kùdì misàndà, twà cyena-màngumba. “Twètù ba-Baptistes, tudi naaci. Bòbò kabèèna naaci bwalu to. Twètù ba-Méthodistes, tudi naaci.” Mabòkò à Nzambì mmatwè ku mbù nè ku mbù mukwàbò, nè ku mwelelu nè ku mwelelu mukwàbò wa màyi, àdi mwà kusùngila too nè ku ndekeelu. Kàdi aci’s ke citùdi tusangana mu myaba yitùyaayà.

⁵⁴ Bìdi ànu bu mwàkambà Davidì, kàbìdì, mu Misambu 1. Wàkamba nè: “Wa disànka mmuntu wíkala kàyì mwà kудisanga nè baseki nè bantu bàdì kabàyi bàneemeka Nzambì aba, kàyì muswikàkàne naabò to, kàyì ùsòmbela mu cisòmbèdì cyàbò to. Nudi bamanyè’s, baseki bàdì bàmba nè: ‘Matùkù à bishimà

àkaadi mamanè kupita. Nè dibàtiiza dyà Nyumà Mwímpè didi ànu diitabuuja dyà budingibudingi.' Wa dyàkalenga mmuntu wíkala kàyi mwà kwenza nànkú. Wa dyàkalenga mmuntu wíkala mwà kuumuka ku cintu bu nànkú. Kí mbaswè kusambakaja abi to. Nè kwèna mwà kusambakaja bintu abi to. Wa dyàkalenga mmuntu wíkala kàyi mwà kudisangisha nè kubwela mu cìmwè cyà ku bintu bìdì bìvila Bukolè bwà Mukalenge abi."

⁵⁵ Bible mmwâmbè nè: "Pàtukàayi munkaci mwà bàà nànkú awu, bwalu ditùkù nedilwe diikalàbo bapapè mitù, badibàndishi, banangi bàà bisànkasanka kutàmba kwikala banangi bàà Nzambi; biikàle nè cìmwènekeli cyà difwàna dyà Nzambi, kàdi bàvila Bukolè bwàdi: tàpulukàayi nè bàà bwena abu."

⁵⁶ "Wa disànkà mmuntu wíkala kàyi mwà kudisangisha nè baseki aba, bèelulwila, bàbiikila Èkèleeziyà mulelèlè nè: 'musumbà wà bakoleshi bàà maalu.' Yèyè neikalè bu mucì wùdì mukùna ku kâlà kwà misùlù yà màyi." Nzambi mmumutèèke mu mwaba musungula. "Mamuma èndè kàkufubidila to. Yèyè neàpàtule mabèji èndè nè mamuma mu muvù." Tàngilàayi mwàkapàtula Davidi myàkù ayi's. "Muntu ewu mmubènèshiibwe. Neikalè mukùnyiiibwe," kí ng'anu mutèeka cyanàana to. Nudi bamanyè's, mèmè ntu muswè kumòna cintu kampàndà cikùnyiiibwe.

⁵⁷ Mpindyewu, Izalèlèlè, mu Èjiipitù, kàvwa mukùnyiiibwe nànsha. Bàvwa batèekiibwe ànu cyanàana. Kacivwa buloba bwàbò bwà ku cibangidilu to. Kàdi muntu udi mwena Kilistò, udi ushindamijila kwèndè kwà Cyendèlèlèlè kùyaayaye pa twitabàayi kampàndà wà cyena-màngumba, kèna mu mwaba wèndè mujaalàme to. Úvwa mulediibwe bwà kwikala mudishikàmìne, nè mwànà wa Nzambi, bwà kukuukwila Nzambi. Kàdi yèyè ùdi mwînshì mwà twitabàayi kampàndà, kèna mwà kukwàma mamuma èndè to, kàdi pàabi's cintu kampàndà munda mwèndè cijinga kucyènza.

⁵⁸ "Yèyè neikalè bu mucì wùdì mukùna ku kâlà kwà misùlù yà màyi." Misùlù, ku búngi; màyi, ku búmwè. Misùlù yàbúngi yibwela mu kajila kàmwè. Mu ngaakwilu mukwàbò, yèyè neikalè bu muntu mu Mifundu, wùdì witabuuja Díyi dyònsò dyà Nzambi, mùdì Bukolè nè mapà citèemà à Nyumà mwà kutùnkumukila, mu Nzambi umwèpelè, mu buumùntù bwèndè bwà munda menemene.

⁵⁹ Bantu kabàtu biitabuuja dyela dyà mbilà to, bwalu bùdiku mbwà nè, kabèèna nè disànkà dyà nyumà to, nè masànkà à mu màyi à Mwoyi àdi mwà kutùnkumukilamù. Ke cidì citàmbe kwikala lutàtu mu Branham Tabernacle ncyôci aci, bwalu bwà bupidyà, diditacisha dyà maalu à pa buloba mbiswiike bantu mu mùshindù wà nè kabèèna mwà kupàtula dikola dyà mu nyumà nànsha.

60 Ke lutàtù lùdiku nè ditùnga dyètù ndwôlò alu. Ke lutàtù lùdi naalù èkèleeziyà yètù ndwôlò alu. Kabèèna nè disànkà to. Nè disànkà dyà Mukalenge ndimanà kuya. Bu mwàkafùndiibwabi musangu kampàndà mu Mifùndu, mwàkù wà cyena Ebèlù wà Ikàbòdè, wùdì wùmvwija nè: “Bwikadi bwà Mukalenge mbumanè kuya.” Aci’s cidi pa èkèleeziyà yètù, bwalu tudì buumùke ku cishimikidi cyà ku cibangidilu, nè baditèèke twètù biinè mu twitabàayi nè òngumba, nè baanyishile maalù à pa buloba bwà kuumishawù dilabula dyètù nè Nzambi.

61 Kaa, ndàayi naanyi ku Arizona. Lekèlaayi nye neenù mu bipèèlà, muntù mbànda mpweka bidimu búngibi. Bintu byònsò mu cipèèlà bìdi nè musongolo pambidi. Dìna kaacikùnyibwà kakesè kònsò kaùdi ulengakù, kùseemenyikù pabwìpi naakù to, nekàkutwè. Kàdi dîbà dyònsò ànu nè misongolo kacya mikenye ku mènù, midilongòlòle bwà kutwà cintu cyònsò cidi ciseemena pabwìpi naakù aci. Mbwalu kaayi ebu’s? Ncinyi cidi cìcivwije musongolo? Mbwalu kacayèna nè mâyi to. Ke cidi cìcùmisha. Musongolo awu’s ndibèji, didivunge. Bwà dipangila dyà mâyi, didi dilwà musongolo.

62 Ke mùdibi kàbidi nè èkèleeziyà, leelù ewu nè, pàdi èkèleeziyà ùmuka ku Mpokolo wa Mwoyi, pàdiye ùmuka kule nè masànkà à lupàndu, pàdiye ùya kule nè Mukalenge Nzambi, dîbà adi muntu awu ùdi ùlwa musongolo, misangu yònsò ùjandula ànu bilèmà, munkaci mwà kutwàngana, paùdi ànu useemena nè: “Mémè ndi Presbytérien. Ndi Méthodiste. Ndi *kampàndà*. Kùngambidiku bwà cintàkanyi aci to.” Musongolo’s! Kacayèna nè mamuma to.

63 Angàtà mucì wùmwèwùmwè awu, ntùlu, nè ùwùtèèke mu buloba mu nkòngo mikesè, mùdi mâyi àbùngi amu, nè musongolo awu newùvùngulukè nè newùlwe dibèji dinèfùke, dikwàma mamuma.

64 Mbwalu kaayi ebu nè èkèleeziyà leelù ewu’s? Ùkaadi mudibweje mu òngumba, didi ditèèke twitabàayi ya cyena-màngumba nè dimuswike, kàyi disànkà, ànu dimyamina dyà mâyi ku misangu, dyà kaaditàbuluja kakesè bwà kumulaminakù. Cidi cimukèngelà, nkupàtuka munkaci mwà baseki nè beena bupidyà, nè kukùnyiibwa ku kâlà kwà misùlù yà mâyi.

Bwalu kùdi Mpokolo mùle tètè nè Mashi,
Makòka mu mujilu wà Èmanùwèlè,
Mùdi bangènzàmpèkààtù, (beena bupidyà)
biinyija mwînshì mwà nkwaka awu,
Bàjimija dikeji dyàbò dyònsò dyà dipiilà.

65 “Muci,” mwàkambà Davidi, “wùdì mukùna ku kâlà kwà misùlù yà mâyi awu.” Kaa! Nzambi kèna mwà kutùnkumukila mu ntùlu to.

66 Mpindyewu, mâyi àdi àleeja mwoyi. Tudi bamanyè nè Môsà, mu cipèèlà, wàkatuuta Lubwebwe, nè lwàkapàtwila

cisàmbà cìvwà cyàmba kufwà mâyì à mwoyi. Nè Yesù wàkamba nè: “Ànu mwàkatuutà Mòsà lubwebwe mu cipèèlà amu, ke mwikalà kàbidì Mwànà wa muntu nè cyà kubàndishiibwa,” nè Wàkatuuciibwa.

⁶⁷ Mwoyi wùdi mu kabùlù kàà mashi. Nè Mwoyi awu kawèna mwà kupàtuka pàdi Kabùlù kàà Mashi aku kakàyi kataayisha nè kabòza to.

⁶⁸ Pààkapàtulà Nzambi Izalèèlà, Wàkabàpèèsha diteeta, bu ditùngà. Wàkabàjoomona mu Èjiipitù, munkaci mwà beena bupidyà. Nè kubàtwàla mu bukùbi Bwèndè bwà dinanga, pa mapwàpwà à mukanku, mukankù munène awu, Mòsà, wàkabàlombola ku mwaba nè ku mwaba, ùteeta bwà kubàfikisha mu ngikàdìlù, bwà kusabukabò dyàmwàmwà. Munda mwà bidimu makàmi ànaayi Yèyè kubalombola nè kubàdiisha mu cipèèlà. Nèku Yèyè kudiisha buloba, buloba bwimpè, buloba busungula. Nè Wàkaleeja cishimà Cyèndè, bimanyinu nè maalù à kukèma, munda mwà bidimu makùmi ànaayi mu cipèèlà. Yèyè wàkenza bishimà nè bimanyinu, ku mupròfetà ewu, bwà kuleeja nè Yèyè ùvwa Nzambi. Nganyì uvwa mwà kuumisha mbù pakuumusha Yèyè? Nganyì uvwa mwà kunyooka Èjiipitù pakuumusha Yèyè? Nganyì uvwa mwà kwela cyanza muulu pakuumusha Yèyè? Kàdi, munkaci mwà biine byònsò abi, Yèyè ùvwa Nzambi, nè WàkaDileeja Yèyè mwinè Nzambi. Ncyà bushùwà nè Yèyè ùvwa muswè bwà cisàmbà Cyèndè kwenzaci nànkù.

⁶⁹ Pashiishe Yèyè wàkabolesha buloba bwà Pàlèstinà, nè mashi à mbùji nè à nkùngùlù yà ngombe, bimpàngà byà ngombe, nè mikòòkò. Kàdi bantu kabààkaswà kutwàla to. Kabivwa bikùmbàne to, bwalu mwoyi wà cimpàngà cyà ngombe... Kabùlù kàà mashi aku nkazaajìibwe, nè mwoyi wà nyama kwalukilawù, kawùvwa mwà kukùmbanangana nè mwoyi wà muntu to.

⁷⁰ Dìngà ditùkù, Nzambi wàkapàngadika nè Yèyè ùvwa muswè kusungila cisàmbà Cyèndè, Èkèleeziyà Wèndè mudyanjila kulongolola. Bivwa bikèngela bwà Yèyè kucyènza, Yèyè mwinè, bwalu Yèyè wàkadyànjila kucìlongolola kumpàlà kwà difùkà dyà dyulu nè buloba.

⁷¹ Muntu ùdi dipangila, nè ke mwikalàye misangu yònsò. Yèyè ùdi dipangila, ànu kwinè kwònsò aku, nè yèyè neikalè misangu yònsò ànu dipangila.

⁷² Nzambi, mu didyànjila-kulongolola Dyèndè, mu meeji Èndè Sungasunga manène à kaàyi mikàlu awu, wàkalongolola ndongamu bwà kukùna Mwonji wà mvinyò mulelèlà. Nè Yèyè wàkakùna pa buloba apa, Mwonji wà mvinyò, Mwonji wà mvinyò mwakàne awu; kì ndingumba to, kì ng'èkèleeziyà to, kì ntwtàbàayi to, kàdi Muntu, Yèyè mwinè, muvwijìibwe mubidi. Nèku Yèyè wàkamwènesha ditalala Dyèndè, Bukolè

Bwèndè, Mwanjèlò munène wa Nzambi awu. Yèhowàh munène awu ùvwa Nendè. Nè munda Mwèndè mùvwa musòmbèlè kaabujimà kàà Bunzambi mu mùshindù wà mubidi. Kàdi bantu kabààkaMwitabuuja to; nènku kubènga kuMwitabuuja bwalu Yèyè kàvwa mwà kupetanganakù nè twitabàayi wabò awu to.

⁷³ Ndekeelu wa byònsò, kuMulombolabò too nè ku Kàlvariyò, kwòkò aku Kabùlù kàà Mashi aku kàakazaajiibwa, kàà Mwànà wa mushinga mukolè wa Nzambi, Mubidi wùvwa Yèhowàh musòmbèlemù awu. Kwàkapàtuka Mwonji wà mvinyò, nè miji Yàwù mu Butùmbi, nè matàmbà Àwù pa buloba, bwà kupàtula Èkèleeziyà wa Nzambi udi nè mwoyi, uvwa mwà kuleeja patòòke dibìikà Dyèndè dya ku lufù nè Bukolè Bwèndè. Mbalùme nè bakàji kaayi aba bàdi bafwànyine kuvila Èkèleeziyà awu, Mwonji wà mvinyò wa Nzambi udi nè mwoyi awu? Bwikadi bwà Mukalenge Yesù bùtù kabùyikù bupangila abu bwikale nè Èkèleeziyà Wèndè, bwà kwikala nè mwoyi, nè kuleeja patòòke matàmbà Èndè madyànjila kulongolola àkapetaYè kumpàlà kwà difùkà dya dyulu nè buloba, nè wàkadìcipila ku bòbò aba nè Ùvwa mwà kubàbiisha ku lufù. Nènku Èkèleeziyà Wèndè leelù ewu, nè butùmbi bwà dibìikà Dyèndè dya ku lufù busòmbèlè munda Mwèndè: “Mémè ndi Mwonji wà mvinyò, nwènù nudi matàmbà.” Musangu wònsò wùdi mwoyi wùtuuta, mashi àdi àdìpwidijila kùdi cidimba cyònsò cyà mubidi. Musangu wònsò wùdi mwoyi wà lulamatu wà Nzambi wùtuuta, wùdi wùpuuyakeena mu Dìnà dya Yesù Kilistò, wùtangalakila Èkèleeziyà, “Cyònsò cinùdi nulòmba mu Dìnà Dyànyì aci, Mémè nèncyènzè. Ndi neenù misangu yònsò, too nè ku ndekeelu kwà buloba mene.”

⁷⁴ Kabyèna bikèmesha to pàakambà Peetèlò, mu Ditùkù dya Mpenta nè: “Nyingàlàlaayi, muntu nè muntu wa kunùdi, nùbatijiibwè mu Dìnà dya Yesù Kilistò bwà dilekelediibwa dya mpèkaatù yènù, nènku nenùjiibwè nè Mwoyi wà ku Mwonji wà mvinyò.” Nyumà Mwimpè ùfila Dìnà Dyèndè, bwà nè twètù baswikàkàne Nendè, Yèyè mmuswikàkàne nè Nzambi, bwalu Yèyè ùvwa Muji nè Mùtòlokò wà Nzambi.

⁷⁵ Wàkalwa pa buloba. “Buloba bwàkenjiibwa kùdiYe. Yèyè wàkalwa pa buloba; kàdi bàà pa buloba kabààkaMumanya to.”

⁷⁶ Nènku mpindyewu, leelù ewu, Yèyè, paanyimà pàà lufù Lwèndè, bwà kufila Kabùlù kàà Mashi, bwà kucibula, bwà nè ku Mashi à Yesù Kilistò Èkèleeziyà wàmòna mwà kujidiibwa nè kutèèkiibwa mu bulongàme, bwà nè Nyumà Mwimpè munène, udi Mwoyi wà Mvinyò awu, Mwoyi wà Cyèndèlèlèlè wà Mvinyò awu, bwà Nyumà Mwimpè awu wàmòna mwà kupuuyakeena munda mwà cidimba cyònsò cyà Èkèleeziyà wa Nzambi udi nè mwoyi.

⁷⁷ Kabyèna bikèmesha to mùdibo cisàmbà cyà pabwàci nè cyà mùshindù. Kabyèna bikèmesha to mùdibo bènza maalù à

pabwàwù. Kabàcyèna kàbìdì nè maalu à pa buloba ebu to, bwalu mbafwè nè bajiikiibwe mu Kilistò, nè babiishibwe bwà mwoyi mupyamùpyà, bwà kwikala mamuma à ntwàdijilu à aba bàdì bàsànkà nè dibiikà dyà ku lufù dyà mu nyumà, bwà Nyumà Mwimpè wàmòna mwà kupicila mu cidimba cyònsò, nè kuleeja butumbi bwà Nzambi patòòke, mwàkabùleeja Nzambi Èjjiipitù pààkapàtulàYe Mwonji wà mvinyò awu.

⁷⁸ Mpindyewu, kùdi mwonji wà mvinyò wà mu cisuku. Bible ùdi wàkula bwà bwalu bwàwù mu Bakalenge Mwibìdì. Kàdi nuwà bamòne, pààkapàtuka muyiishi ewu bwà kukungwija nkùnde, wàkajoomona ku mwonji wà mvinyò wa cisuku. Mvinyò yà cisuku ayi yidi nè cyà kutòlokela pabwipi nè sèminère mwaba kampàndà, bwalu cìvwa mmu cilongelu cyà bapròfetà. Ke kwambulayè dibòko dijimà dyùle tètè nè bilòwalowa. Kubyèlayè mu lwesu, nè kuteetayè bwà kubisambakaja nè musàbù mulelèlè, mushùwashùwàlè. Ke kwelabò lubilà nè: “Lufù lùdi mu lwesu.”

⁷⁹ Mwanètètù, kùdi mwonji wà mvinyò wà cisuku mutòlòke, nè ùdi ùkolela lwà ku twitàbàayi, òngumba. Kàdi pàdiwu wùpàtuka kuntwaku, ùdi ùkànga disànkà dyònsò dyà nyumà. Kàdi katanci aka anyi, mwonji wà mvinyò awu mmufwè.

⁸⁰ Kàdi Nzambi mmupàngàdike bwà nè mvinyò Wendè kàfù to. Pa nànkù Yèyè kuMujoomona mu twitàbàayi ayi, nè kuMuuja nè Nyumà Mwimpè, nè kuMushikika panshi, mu Dinà dyà Yesù Kilistò. Mwaba awu Èkèleeziyà awu ùdi mwà kupuuyakana nè kwikala nè mwoyi, nè kusànkà, kuumvwa Bwikadi bwà Nzambi udi nè mwoyi, ùMutàngila wèndakana nè wènta bintu byàkenzàYe pààkadiYe pa buloba apa abi.

⁸¹ Bwà cinyi? Matàmbà Èndè, dilamakana Dyèndè, muji Wèndè, cibangidilu Cyèndè, wàkadi Nzambi. Yèyè ùvwa Mwànà wa mùkòòkò mushipa kumpàlà kwà difùkà dyà dyulu nè buloba. Kumpàlà kwà kwikalakù dyulu nè buloba, Yèyè wàkadi nè Nzambi. Yèyè ùvwa Muji nè Mütòlokò wà Davidi, Mütootò wà mu Dindà, Mbata wa mu Cibanda. Ke cyàkadiYe.

⁸² Miji Yèndè mmijìngila ku Nzambi, minyùngùlùkile Nkwasa wa butumbi, minyùngùlùkile Bukalenge bwà Nzambi. Miji Yèndè mmijìngilakù. Mwoyi Wèndè wàkatangalaka pa buloba. Nè Yèyè wàkafila Mwoyi Wèndè, bwà Wàmòna mwà kwalukila ku miji nè kupuuyakana kàbìdì, bwà kupàtula matàmbà mu Mwonji wà mvinyò awu, cidi ciikàle Èkèleeziyà Wèndè munkaci mwà kuleeja bipeta bimwèbimwè byàkaleejaYe pàvwaYe pa buloba apa abi, bwà kuMuvwija umweumwe awu makèèlèlè, leelù, too nè kashidi.

⁸³ Éyi Èkèleeziyà wa Nzambi udi nè mwoyi, itàbùùjà eci, Bulelèlè! Ki Yèyè awu. Pàdi Nyumà mulelèlè wa Nzambi ùkwàta mudimu pa mwena kwitabuuja, cyònsò cidi Mufundu wàmba aci, yèyè neàtwe: “Amen.” Bwà cinyi? Nyumà Mwimpè

wâkafûnda Bible awu, ûdi munda mwèndè, ùpuuyakeena mu mwoyi wèndè. Yêyè kèna ùcyûka udi musòmbe mwaba awu, anyi cidi ní nganyi mukwàbò wàmba to. Neciikalè misangu yònsò ànu cìpetangana nè Dîyi.

⁸⁴ Kùdi cyà cibì. Mbilòwalowa. Mbiòòlela ku mwonji wà mvinyò wa cisuku. Mmwonji munène wà mvinyò, wùbwikidija buloba bujimà, kàdi's mmufwè. Byàbûngi byàwù mbimwangelaja munkaci mwà bantu.

⁸⁵ Kàdi, vùlukaayi nè, “Bukula” bùdi bùcyàluja ku Mwoyi, bùcijoomona nè bùcishikamija ku kâlà kwà mwaba wà difwàna dyà Nzambi, wùdi mwikale Kilistò Yesù awu's. Cyònsò cidi Dîyi Dyèndè aci, Diikalè “amen,” bwèbè wèwè. Pashiishe Nyumà wa Nzambi, díbà adi, disàuka dyà nyumà neditùnkumukè ànu mùdi musùlù amu. “Yêyè's mmufwànyine kwikala bu muntu, mucì, wùdi mukùna ku kâlà kwà misùlù yà mâyi. Mabèji Èndè kaàkufùbidila to. Kaàkusòmba mu cisòmbedi cyà basekyanganyi anyi beena bupidyà to, anyi muntu udi kàyi ùneemeka Nzambi udi nè mwoyi bilondèshile maalu à pa buloba awu, kàdi yêyè neàkwamè mamuma mu muvù wàwù.” Mmamuma à mùshindù kaayi awu? Wèwè mukùnyibwe mu Kilistò, neùkwamè mamuma à nyumà, mamuma à nyumà à Nyumà Mwimpè. Nyumà Mwimpè mmusòmbèle munda mwèbè.

⁸⁶ Bàvwa bàakule bìmpè, kùdi mukàji wa ku ciinà cyà mâyi awu. Bwà kujikija, tudi bafwànyine kwamba nùku ewu, wàkamba nè... PàakaMumònàye, Úvwa nè mmwènekèlu ànu wa muntu wetù wa patupù ewu, kakùvwa cintu nànsha cìmwè cyà cikòka ntèmà pa bwalu abu to, cìvwa cikòka ntèmà's wè, èyowà.

⁸⁷ Bwalu Mifundu mmyâmbè nè: “Kakwèna bulenga nànsha bùmwe butùvwa mwà kuMujingila to. Twakasokoka mpàlà yètù kùdiYe.”

⁸⁸ Nè bàdi bènza cintu cìmwècìmwè aci leelù ewu. Bòbò kabàyi bàtancila mu mamuma à nyumà à Nyumà to, bòbò kabàyi bàtancila ku bintu bìdi byà Nzambi to, Kilistò ncintu cibì kumòna bwàbò bòbò, “Musumbà wà bansantu babùnguluki bàà mu malaba, musumbà wà bantu bapàle bàdi kabàyi nè lungènyi mu lwòlò to.”

⁸⁹ Kàdi, bwà mwena kwitabuuja, ùdi ùCyùpukila. M'Mwoyi wà Cyendèlèlèlè. Cintu nànsha cìmwè kacyèna mwà kutùtàpulula nè dinanga dyà Nzambi to. Nànsha lufù, anyi tunyinganyinga, anyi ciyòlè cyà nzala, anyi cintu nànsha cìmwè kacyèna mwà kutùtàpulula to. Tudi bakùbìbwe Cyendèlèlèlè mu mabòkò Èndè. S'ke twètù abu, padiye ùpukila nkùrusè.

⁹⁰ Mukàji awu wàkamba, pàvwa... Yêyè wàkeela lukonko nè: “Udikù mwà kuNtwàdila mâyi à kunwà anyi?”

⁹¹ Yèyè nè: “Kàdi kacitu cilèlè bwà Wêwè ewu, muntu mulùme, mwena Yudà, bwà kwela mwena Sàmaalèyà, mèmè mwìnè ewu, lukonko lwà mùshindù awu.”

32 Yèyè nè: “Kàdi bu wêwê mumanyè...” Mu ngaakwilu mukwabò, nùnkù ewu: “Bu wíkala mumanyè mùshindù úvwà pabwípì nè Mpokolo wa Mwoyi, nùnkù’s Ndi mukupèèshe màyi àudi kùyì mwà kulwa apa bwà kusuna to. Mémè nènkkukùnùnè, wêwè mwena Sàmaalèyà ewu. Nènkutwàlè, wêwè ngènzàmpèkààtù ewu.” Awu mmwena bùpidyà, kàdi kàyì ùCìitabuuja to. “Bu wêwè ànu mwà kuNdekèla nkujoomona mu dindà emu, Yèyè kwamba nè: Nènkukùnè ku mwelelu wà misùlù yà màyi. Nènkutèèkè mu mwaba kampàndà, ku dibàtiiza dyà Nyumà Mwimpè, bwà wìtabuuje Dìyì dyònsò dìndi ngàmbe nè m’Bulelèlè adi. Bu wêwè mwà kuNdekèla ànu nkujoomona, mu dindà emu, newikalè ditàmbà dimpè. Wêwè kwèna wa mu budimi bwà mvinyò bwà cisuku abu to. Udi wa *mwab’ewu*, pa nànkù Ndekèlè nkujoomònè; nkukùnè mu Dìna Dyànyì, ku kàlà kwà misùlù, dyàpa dyònsò dyà Dìyì dyà Nzambi. Bwalu Dìyì dyònsò dyà Nzambi ndilelèlè. Mulayi wònsò wà Nzambi m’Bulelèlè. Nènkukùnè ku kàlà kwà misùlù yà màyi àmwèpelè, Nzambi umwèpelè. Nènkù nèukwamè mamuma, mu muvù wèbè. Mabèji èbè kaàkufùbidila to. Nè cyònsò cyùdi wenza necilubulukè. Newimanè piikalàku kakùyì mwaba mukwabò nànsha wùmwe wà kwimanyina to, newimanè, nànsha bìshi, mumanyè nè Nzambi ngudi mwenze mulayi. Lekèlè Mémè nkujoomònè,” mwàkambàYe, “bwà nkukùnè lwà mwab’ewu ku kàlà kwà Màyi, mu mùshindù wà kabiyi bikèngela bwà wêwè—wêwè kuya ku myaba yà twìtabààyi eyi, nè myaba yà cyena màngumba to, bwà kusangana nè, kwèna mwà kuÀpeta mwaba awu to, nànsha bìshi. Lekèlè Mémè nkujoomònè, ku ciinà cyà kale cyùme eci, kùdi nè cyà kutùtangana nè mbekeci yà byamu, nè kwenza mutooyi nè lukutukutu, nè kunwà ndambù, kàdi kwalukila nè kunwà ndambù. Nènkupèèshe Mwoyi wà Cyendèlèlè, disànka, ànu mùdi ciinà cyà màyi amu, citùtuka too nè ku Mwoyi wà kashidi. Ndekèlè Mémè. Lekèlè Mémè nkwenzèlè nànkù,” mwàkambilà Kilistò mukàji awu, ngènzàmpèkààtù’s.

⁹³ Nè Yèyè ùdì wàmabila Èkèleeziyà cintu cìmwècìmwè aci mu dindà emu. Nudi bamanyè nè kùdì Nzambì kampàndà. Nudi nwitabuuja nè kùdì Nzambì kampàndà's. Kàdì mu diswikakana dyènù amu, cintu kampàndà ncìnùkòse. Nudi mu cipèèlà. Kamwènakù disànkà dyà nyumà nànsha dikesè to. Nidikù baswè kudyùmvwà mwàkadyùmvwàbo mu Ditùkù dyà Mpenta amu. Kanwènakù bafwànyine kunanga kupeta disànkà dyàkadìbo naadì adi anyì?

⁹⁴ Pààkapòngololà Nzambì Mwoyi Wèndè, mu ditàmbà dyà kumpalà dyà mucì awu, mucì awu wàkabanga kwenza maalu bu bantu bakwàcike maalà. Bààkatètuka mu bwenzeji bwà

Nyumà. Bakàjì batekète bananga, bàà cijila bu virgò Màriyà, kuntwaku bènza maalu bu bàvwa bakwàcike maalà. Kaa, ùvwa mukwàcike nè Nyumà. Ke kuteetayè bwà kwakula, kàdi kàvwa mwà kwakula to. Ùvwa nè *mishikù yikukumina*, cìdì cyùmvwija nè “mipandùlùke,” mbwà kukukumina, kuteeta kwamba cintu kampàndà. Ùvwa mùle tètè nè Nyumà mu mùshindù wà nè, kàvwa mwà kucyàmba to. “Uh-uh-uh-uh,” *mishikù yikukumina*. Pashìishe, dyàkàmwe, nè mwakulu mukwàbò, bòbò kwakula nè dīyì dikolè.

⁹⁵ Nè muyiishi mukesè uvwa kàyì mutàmbe kumanya mene mwà kufùnda dīnà dyèndè pa dibèjì dyà mukàndà, kukùdimikayè kashèètè kàà nsàbangà panshì anyì cintu kampàndà, anyì cikuuku, nè kutùpikilapù.

⁹⁶ Èè, beena bupidyà abu kubangabò kwamba nè: “Bantu aba mbakwàcike maalà. S’ke musumbà wa bansantu babùnguluki bàà mu malaba wàwà’s.”

⁹⁷ Kakwàcikwètù aka kubàkulakù Mufùndu; kī mmukàndà wà twitabàayi to, kàdi m’Mufùndu. Yèyè nè: “Nwènù beena Izàlèlèlà, nè nwènù bàdì basòmbèle mu Yelusàlèmà, eci cimanyibwè kunùdì. Bwalu bantu aba kī mbakwàcike maalà munùdì nwènù nwela meeji nè mbakwàcike amu to, pa kumòna nè tucìdì ànu pa dībà citèemà dyà ditùkù. Kàdi eci ncyàkambàbo kùdì mupròfètà Yowèlà *aci* nè: ‘Neyènzekè mu matùkù à ndekeelu, mùdì Nzambì wàmba, nè Mémè nèngìcìkijè Nyumà Wanyì,’ ke cìdì munkacì mwà kubàtùtula aci’s.”

⁹⁸ Nudi baswè bwà kujoomonyibwa mu twitabàayi kampàndà wa kale wa mùshindù kampàndà, bwà kusòmba ku kàlà kwà Mpokolo yà Mwoyi, kùdì ditalala bu musùlù aku anyì?

⁹⁹ Lufù, lwòlù lwìnè, kùdì mwànà mukesè wa balùme udi mwimàne kuntu kwàka wàwa, mùle tètè nè kànsèrè, kàdi mmupetè Nyumà Mwimpè. Nè bangàngàbukà bàvwa bàmwambila mùvwàye ùpunga nè lufù. Tatwèndè kumukonkayè nè: “Udi—udi nè bwòwà anyì?”

¹⁰⁰ Yèyè nè: “Ndi mudilongòlòle. Ndi mudilongòlòle. Nè bwà kushiya bujaadiki kùdì bàà pa buloba ebu, njiikàayi mu bilàmbà bikùnze, bwalu necìikalè cimanyinu cyà nè Mashì à Yesù Kilistò mmambwikile.”

¹⁰¹ Ke cìdìCi cyènza ncyòci aci. Disàanka, bu musùlù, ùdi mwà kwenda kumpàlà kwà lufù, kwenda kumpàlà buloba, kwenda kumpàlà kwà diteeciibwa, kwimana kumpàlà kwà badyudi kàdi kukenka bu Mwanjèlò’s. Bwà cinyì? Mwoyi wèbè kī ng’wèbè wèwè mwìnè to. Udi mufwè, nè udi mujiikìlbwe mu Dīnà dyà Yesù Kilistò, nè mubìike ku lufù kàbìdì ku Mwoyi mupyamùpyà. Yèyè ùdi mwà kupuuyakeena mu wèwè, dibènesha Dyèndè, nè kupàtula matàmbà àdì maswikàkàne nè Mwonjì wà mvinyò awu. “Mémè nèmbàtèèkè mu mwaba musungula.” Nzambì mmwàmbe nè Mwan’Èndè ùvwa disungula Dyèndè.

¹⁰² Mmuniyì mùdì ubwela mu Kilistò? Peetèlò wàkamba cinyi mu Ditùkù dyà Mpenta, bwà mùshindù wà kubwela mu Kilistò? Wàkamba nè: “Nyingàlàlaayi, muntu nè muntu wa kunùdì, nè nùbatiiibwè mu Dìna dyà Yesù Kilistò, bwà dilekelediibwa dyà mpèkaatù yènu, nènku nenùpetè kupà kwà Nyumà Mwimpè. Bwalu mulayi wùdì kunùdì, nè kùdì bānà bèènu balela, nè kùdì aba bàdì kule, mu bungi bwònsò bwàbiikilābo kùdì Mukalenge Nzambi wetù abu.” Nè nwènu pèènu’s, nudi mu dibiiikila adi. “Nyingàlàlaayi, nùbatiiibwè mu Dìna dyà Yesù Kilistò bwà dilekelediibwa dyà mpèkaatù wenù. Mulayi wùdì kunùdì.”

¹⁰³ Kaa, mwanèètù, Nyumà mulelèlā wa Nzambi nèapuuyakeenè pa Cyôci aci, wamba nè: “Aci m’Bulelèlā.” Tàngilāayi bilòwalowa nè mwonjì wà mvinyò wà cisuku awu. Kàdi Nyumà mulelèlā wa Nzambi, udi muswè bwà kukunyiibwa mu mwaba musungula, mùdì mamuma à Nyumà’s!

¹⁰⁴ Kàdi cyàkenzà Yesù pashìshe ncinyi? Wàkamba nè: “Bu mùdibi nè mukàjì awu mmuswè kwitaba cyôci aci. . .”

Wàkamba nè: “Mukalenge, mpèèshèku Mâyì awu. Ndi muswè Mâyì awu.”

¹⁰⁵ Yèyè nè: “Lekèlā nyingù webè wa kale awu mwaba awu. Kabyèna bikukèngela kàbidì nyingù wa mâyì wà mùshindù awu to. Kabyèna bikukèngela mukàndà mukufùndila wà ku twitabaayi webè awu to. Lekèlā mùshindù wèbè mudyènzela wà ba-Presbytérien, wà ba-Baptistes, wà ba-Méthodistes, wà beena Mpenta, ùshiye paanyimà. Lwàku ku Mpokolo ewu. Nènku Nènkuujè nè disànkà diikala mwà kutùnkumuka bu musùlù.”

¹⁰⁶ Ànu mwàkamba muntu mununu wa bafìike awu nè: “Ndi nè ditalala bu musùlù.” Ditùnkumuka muunya nè bufùku. Kumpàla kwà lufù, didi ditùnkumuka ànu mùshindù wùm-wèwùm-wèwùm awu.

¹⁰⁷ Pòlò wàkamba nè: “Lufù kalonda kèèbè kàdi penyi? Nè lukità bucimunyi bwèbè bùdì penyi? Kàdi twasàkidila kùdì Nzambi udi utùpèèshila bucimunyi ku Yesù Kilistò.” Cyà bushùwà’s.

¹⁰⁸ KuMutàngilayè. Kubangayè kuyiikila Nendè bwà mwaba wà dikuukwila. Ke kumwambilaYè nè: “Ndà ùkangàtè bàyeebè.” (“Nèmmumanyishè nè Nzambi newùcidi nè mwoyi. Mèmè ndi Mwonjì wà mvinyò.”) “Ndàaku ùkangàtè bàyeebè.”

“Mòna’s,” mwàkambàye, “ncitu nè bàyaanyi to.”

¹⁰⁹ Yèyè nè: “Ncyà bushùwà. Uvwa naabò bàtaanu, nè ùdì musòmbè nendè mpindyewu awu kì mbàyeebè to.”

¹¹⁰ Mukàjì kukùdimukayè. Cìvwa ncinyi aci? Dyèndè—dyèndè disomekiibwa, mwoyi wà ku mwoyi wèndè, kwàkadiye mujoomònyibwè ku mucì wà twitabàayi wà kale, kwàkadiye kacya wàkwàta aku, pàakabwela dipuuyakana dyà kumpàlā dyà Nzambi mu matàmbà èndè amu.

mu mpèkaatù webè, ikàlà mujoomònyìibwe mu mpatà yèbè, mu twitabàayi yèbè.

¹¹⁸ Ncyèna nnwàmbila bwà nwénù kuumuka mu èkèleeziyà wenù to. Shààlaayi nwénù nè èkèleeziyà wenù, kàdi nùlwe kùdi Kilistò. Ke cyôci aci. Nànsha wêwè uya mu èkèleeziyà kaayi, paùdi ànu nè ulwàlwa ku Mpokolo udi mûle tètè nè Mashi awu.

¹¹⁹ Akidilà Mwoyi Wèndè, nè lekèlè Ûkubiishe, ùkubiishe ùkumusha ku dikàcila dyà maalù à pa buloba, too nè pìikalà bintu byònsò byà pa buloba bifwè. “Ewu udi munangè maalù à pa buloba, anyi bintu byà pa buloba, dinanga dyà Nzambi kadyèna nànsha mene munda mwèndè to.” Kwèna mwà kutèeka mwoyi wà diwòji mu mwonji wà tumuma twà mvinyò, kàdi kukwàmawù tumuma twà mvinyò to. Nwamònu anyi? Pawikala wa Kilistò, udi unanga bintu byà Kilistò. Udi mûle tètè nè Nyumà. Udi... Yèyè ùdi Mwonji wà mvinyò; nwénù nudi matàmbà. Mulekèle Yèyè àkwakidilè mu dindà emu, mwàkenzàYe mukàji wa mu Sàmaalèya amu, nè àteekè mwoyi wèbè mu Mwoyi Wèndè, nè àkuvwijè cifùkùibwà cipyaciipyà.

Patùdi twinyika mitù yètù ànu bwà katanci kakesè cyanààna apa.

¹²⁰ Kumpàlà kwà disambila, nkufwànyinekù kwikala bàmwè bàdi bafwànyine kwela cyanza cyàbò muulu anyi, bàmba nè: “Nsambidilèku, mwanètù, ndi muswè kwikala muswikàkane bikolè mu Kilistò.”? Nzambi àbènèshè mwoyi wèbè. Kaa, abi’s mbilenga be. “Ndi muswè kwikala mutàmbe kulamakana, mu Kilistò, bwà mwoyi wànyì kukenkawù Bwèndè. Mpàtulè mu mèmè (bwànyì) bwôwà bwànyì bwònsò, nè mpatà, nè dilubakana, nè twitabàayi. Nè unkùne munda Mwèndè, mu dindà emu, mûndi mwà kupeta ditalala bu musùlù. Ndi mubindùlùke bikolè. Ncyèna mumanyè kûnyaaya to. Ncyèna mumanyè mùshindù mwinè wûndi mwà kwimana to. Ntèkè muntwamu’s.”

¹²¹ Mpindyewu patùcidì nè mitù yètù miinyika apa, nwénù bàdi mwà, bàdi beelè byanza byènù muulu abu, udikù mwà kujuukila kuulu, bwà mwàkù wà disambila anyi? Ànu... Netùkusambidilè, ànu mwaba wûdi awu. Bwalu, tudi nè... Juukilaayi kuulu mpindyewu, bwà twamònakù mwà kusambila.

¹²² [Katùpà kàà mukàbà wà mèyi munda mutupù—Muf.]... kuumusha ku bôbò, dilubakana dyònsò. [Katùpà kàà mukàbà wà mèyi munda mutupù.]... bwà kuswikakana nè dibènga kuneemeka Nzambi awu; bwà kwendela mu Bukènke bupyabùpyà, kubangila ku ditùkù edi. Enzàku nànkù, Mukalenge.

¹²³ Wêwè wàkamba nè: “Lòmba, nèupètè. Kèbaa, nèupètè. Kookòlà, nè nèbàkunzùlwilè.” Mpindyewu bàdi bàkookola. Ndi ndòmba. Swàkù bàcipètèku, Mukalenge. Swàkù bwà ditùkù edi dishintulule nsòmbelu yàbò mu mùshindù wà nè, too nè

mwikalàku kàbìdì kakùyi mpatà mikwàbò mu meeji àbò nànsha. Nènku swàkù bwà bàlwe Kùdì Kumbèlu, mu Ditùkù adi.

¹²⁴ Mbiimàne kuulu, Mukalenge, mu dindà emu. Mbiimàne kuulu Bwèbè mpindyewu, kumpàlà kwà bantu naabò. Wèwè udi mwàmbe nè: “Ewu wíkala mwà kwenza cintu bu nànkù, Mémè nèntwè ku cyèndè kumpàlà kwà Nzambì nè Banjèlò bàà cijila. Kàdi yèyè muMfwè bundù, díbà adi, mu Ditùkù adi, Nèmmufwè bundù.” Mukalenge, bôbò kabèèna nè bundù to, mu dindà emu. Mbiimàne kuulu. Mpindyewu, Wèwè udi cyà bushùwà ulama Díyì Dyèbè. Bùjèku nè Nyumà Webè, nè ùbàpèèshèku nsòmbelu wa mudimu, bwà nè, mu buloba bùcilwalwà, bààmònakù mwà kusànka nè Bwikadi bwà Mukalenge Yesù bùtù kabùyikù bupangila abu. Kubangila ku ditùkù edi, kubangila apa, tudi tubàlàmbula Kùdì, mu Dìna dyà Yesù. Amen.

¹²⁵ Nzambì àkubènèshè. Muntu kampàndà udi pabwìpì naabò àbàlabùle ku cyanza, udi pabwìpì naabò awu.

Kùdì Mpokolo . . .

¹²⁶ Mpindyewu diyiisha dyàjikì, mpindyewu kuukwìlaayaaku Mukalenge, enzaàyi ànu bu babwitekù kwìsù.

. . . Mashi,
Makòka ku à Èmanùwèlè. . . (Awu's ùvwa
n'Nzambì, Èmanùwèlè.)
Nènku bangènzàmpèkààtù, (beena bupidyà)
biinyija . . .

Ambùlùjà, nyeema, lwàkù.

. . . mwìnshì . . .
Bàdi bàjimija dikeji dyàbò dyònsò dyà dipìlà.
Bàjimija . . .

¹²⁷ Mukuukwìlaayi ànu cyanàànà mpindyewu mu Nyumà. Mwoyi wèbè wikalè ànu mudilekelèla. Nànsha wèwè mwikàle wa mu èkèleeziyà kaayi. Ànu, mu mwoyi wèbè amu nè: “Twasàkidila, Nzambì munanga.”

Nènku bangènzàmpèkààtù . . . mwìnshì mwà
nkwaka awu,
. . . dipìlà dyàbò . . .

¹²⁸ Mpindyewu ndi muswè bwà nwèlè cyanza cyènù muulu, nwènù beena Kilistò, mpindyewu, beena kwitabuuja, nè nwimbè naanyi nunku.

Nènku kacya ànu ku diitabuuja ngààmòna
musùlu awu
Wùdì mpùtà Yèbè yìdì yìzòloloka ayi yìtwàla,
Mpindyewu kì n'twitabàayi kampàndà to, nwavùluka.
Dinanga dipikudi ndikaadi cyena-bwalu
cyànyi,
Nènku nêdìikalè nànkù too nè pangààfwà.

Nè nêdìikalè nànkú too nè pangààfwà,
 Nè nêngìikalè... (Aci neciikalè cyànyì...)...
 Ndi mfwà;
 Dipikudi... (Kí ndiseka to, kàdi dinanga
 dipikudi)... ke civwà cyena-bwalu cyànyì,
 Nè nêdìikalè nànkú too nè pangààfwà.

¹²⁹ Nudi nwambilamù, kùdìYe anyì? Ambàayi nè: “Amen.”
 [Disangisha didi dyàmba nè: “Amen.”—Muf.] Bùikalè nànkú.
Diitabuuja Dyànyì Nditàngile Kùdì.

¹³⁰ Mbanganyì bàdì bàsaama nè biikàle mu lukèngelu, mu dindà emu? Paanyimà pàà dyà nyumà, bìdì bìkukèngela dikwàcisha dyà mubidi. Ela cyanza muulu, dîbà adi tudì mwà kukumòna. “Ndi mu lukèngelu, Mwanèètù Branham. Ndi—ndi mwab’ewu. Ndi nsaama. Ncyèna—ncyèna ànu mwà kufika ku dyumvwa bîmpè to. Nkàadi muteetètètè. Nkàadi muyààyyàaye kùdì ngàngàbukà. Ndi mwenzè byònsò bîmvwà mumanyè mwà kwenza abi, kàdi ncyèna ànu mwà kucikumbaja to, mùdibi bîmwèka’s. Kàdi ndi ngiitabuuja nè Nzambi neànsàngàjè.” Nudi nwitabuuja nànkú anyì? Aci’s ke mulayi Wèndè.

¹³¹ Mpindyewu, udi mukùnyìibwe ku kâlâ kwà misùlù yà Mâyì anyì? Mâyì kaayi? Kilistò mutuucike awu, mu mùshindù wà nè mu lubwebwe amu kufükukamù mâyi bwà kusùngila cisàmbà civwà cifwa aci ku lufù, Kilistò wàkatuuciibwa bwà nè mu mubidi Wèndè mùpàtukè Nyumà Mwîmpè, bwà nè cisàmbà civwà cifwa aci kacifu to kàdi ciikale nè Mwoyi wà Cyendelèlèlè. Nudi...? Kùdì bintu bishìilèshìilàngàne byàbùngì... .

¹³² Nzambi ùdì ùlaya bwà kwondopa. “Wàkatàpiibwa mpùtâ bwà dishipa dyètù dyà mikenji, muzaajìibwe bwà bubì bwètù; dinyooka bwà ditalala dyètù dyàkapòna pambidi Pèndè; ku mibùndàbùndà Yèndè twàkondopiibwa.” Misùlù, misùlù yà Mâyì àmwèpelè, Nyumà Mwîmpè.

¹³³ “Kùdì, dyàmbedi, bàpostòlò, bapròfetà, balongeshi, batangadiki, bampaasàtâ,” misùlù yà Mâyì àmwèpelè.

¹³⁴ “Kùdì mishindù mishìilèshìilàngàne yà mapà. Bàmwè mbabiikidiibwe bwà kwamba cipròfetà. Bàmwè mbabiikidiibwe, bapèèbwa dipà dyà dyondopa. Bàmwè bàdì nè lungènyi. Bàmwè bàdì nè dimanya, ku Nyumà umwèumwè awu. Bàmwè bàdì bààkula mu myakulu. Bàmwè bàyàndamuna. Byònsò ku Nyumà umwèumwè awu,” Kolintò wa Kumpàlà 12. Ncinyì aci? Misùlù, misùlù yà mâyi àbùngì, mâyi àbùngì.

¹³⁵ Misùlù yàbùngì yà Mâyì àmwèpelè, Nyumà Mwîmpè ùdì ùfla mapà nè mabènesha àbùngì myaba yònsò. Ùdì ùtwàla mapà mabanjike, kàbidì, mapà à dyondopa, mapà à lupàndu, mapà à Nyumà Mwîmpè bwà kukwàta mudimu mu èkèleeziyà wenù nè munkaci mwà bantu. Misùlù’s! Nè disànka bu musùlù nè mushimi wà mâyi. Bilenga kaayipu’s wè!

Diitabuuja dyànyì nditàngile Kùdì,

Wèwè Mwânà wa mùkòòkò wà ku Kàlvaryò,
 Musùngidi wa kùdi Nzambi;
 Mpindyewu ngumvwèku pàndi nsambila apa,
 Umùshàku mpèkaatù wanyì yònsò,
 Kaa enzàku bwà nè kuumukila ku leelù ewu
 Ngìikalè mèmè yònsò . . .

¹³⁶ Mpindyewu, Mukalenge, ke disambila dyètù ndyòdì adi. Katwàkulwijakaja to. Eci nnsabatu. Edi's nditùkù dyùdì Wèwè mwenzè. Bìvwa bìkèngela twètù kuKukuukwila ditùkù dijimà. "Ditùkù dijimà nè bufùkù bujimà," mwàkambà mwedi wa kasàlà nè: "Banjèlò bàdi ànu bàntàbaleela mèmè ewu." Mpindyewu tudi tuumvwa nè Bàdi pabwìpi.

¹³⁷ Taatù Nzambi, nyèwù ngàkùlù cintu cyà dîsù dikolè menemene. Kàdi ncyèna mucyènzè. . . Kenkètàku mwoyi wànyì, Mukalenge. Piikalàbi nè ndi mucyènzè ku budimù, dîbà adi mfwilèku luse. Kàdi ndi mucyènzè ku dinanga bwà ditàmbà Dyèbè, Mwonjì Wèbè wà mvinyò ewu. Ndi ndòmba, Mukalenge, bwà nè kwòkò muntu mwaba ewu udi muswikàkàne mu màngumba manène, nwàvùlukaayi. . . Ncyèna nteeta bwà kubàlòmba bwà kuumukayè ku dyòdì adi to. Ndi mmulòmba ànu bwà kàshàadi mufinyina panshi kùdi twitabàayi yàbò ayi to, kàdi bwà àlwe Kùdì, nè ikale mudilekèlèle nè mwipila, nè Nyumà mwicikija munda mwèndè. Dîbà adi èkèleeziyà wabò neàlwe èkèleeziyà mutàmbe bwìmpè, èkèleeziyà wa nyumà, uWikalà nè cyà kulwila awu, kàyi katobà anyi kàyi mufudì to, musukula mu Mashì à Mwânà wa mùkòòkò. Buloba bwà mamanya à mu mitù ebu, leelù ewu, Taatù, mbulalùke ku cyòci aci. Bàdi bènda bàkebangana nè misumbà minène yà bantu nè èkèleeziyà minène, bu mwonjì wa mvinyò wà cisuku. Kàdi, Mukalenge, tudi—tudi tulamata ku mamuma à kalolo awu, mamuma à Nyumà awu, àdi àtwàdila musùukà wètù kalolo awu.

¹³⁸ Tudi tulòmba mpindyewu bwà Ûbeneshèku babèèdì bàdi bàlwa kumpàlà eku bwà kubàsambidilabò aba. Mukalenge, ndikù mwà kuKulòmba kàbìdì musangu ewu, uDikù mwà kujidila ditàmbà didì kadiyì dikùmbànyine edi, ku Mashì Èbè anyi? Bwà Nyumà Wèbè àpòngolokèmu, àleejè patòòke Nzambi udi nè mwoyi awu, bwà nè Wèwè udi Nzambi umwèumwè uvwa wakula nè mukàjì wa ku ciinà cyà màyi awu. Bìikaleku nàнку, bwà bantu kabàshàadikù mu cimvundu nànsha, bwà bààfwànyina kumòna mwaba menemene wùdì Nyumà wa Nzambi ùsanganyibwa, ùdi mu mwoyi wà mwena kwitabuuja, kì mmu èkèleeziyà kampàndà to, kàdi mu mwoyi wà mwena kwitabuuja. Enzàku nàнку, Taatù. NènKwindile mpindyewu, bwà Wèwè kuDileejà, bu muWàkaDileejà patòòke mu matùkù à kale amu. Bu muwàkaDileejilà patòòke ku Yesù, Wàkafwà bwà twamòna mwà kwikala bakezùke awu, bwà nè Nyumà umwèumwè uvwa munda Mwèndè awu wàmòna mwà kulwila munda mwètù, ùtwàlamù bipeta bimwèbimwè abi. Enzàku

nànkù, Taatù. Bwalu ndi ndàmbula bintu byònsò Kùdì, mu Dìna dyà kunanga dyà Mwân'Èbè, Yesù. Amen.

Kùndekèdiku mpàmbuka
Nya kule nè luseke Lwèbè nànsha.

¹³⁹ Èyo, Teddy, *Itàbùùjà Nàka*. Mpindyewu mbanganyì mwab'ewu bàdì...? Billy mmwàmbè nè mmwabànye ndambù wa twartà twà disambila.

¹⁴⁰ Mpindyewu tuvwa, mu èkèleeziyà, bu mùvwàye mupàte patapata, twangata ànu nè tulòmba bònsò bàvwà beenyi munkaci mwètù abu bwà kujuukila kuulu, nè kulekela Nyumà Mwimpè ùpàtuka mu bantu amu nè ùbàjingulula mùshindù awu. Tudi benzè nànkù, misangu yàbùngì. Mpindyewu, kùkaadi ndambù wa mbingu, muntu kampàndà wàkamba nè: “Kàdi mbikolè bwà bantu kuumvwabò cyòci aci. Kàdi mbaswè mulongo wà babèèdì.” Pa nànkù tudi...Mbanganyì bàvwàku kaaba aka pààkayà Nyumà Mwimpè mu musùmbà wa bantu awu nè kwangata muntu yònsò mu musùmbà wà bantu amu? Bushùwà's.

¹⁴¹ Mpindyewu, mvwa mwambìle Billy bwà kwabanya ndambù wa twartà, bwà twamòna mwà kubiikila bantu, ku bisùmbù ku bisùmbù, nè kubàsambidila, nwamònu's, bwà kucijikija.

¹⁴² Ke dîbà adi, nè dyàkàmwè paanyimà pàà eci, nebùikalè nè cyà kwenza mudimu wa dibàtiiza bwènù nwènù bàdì bàjinga kubàtijiibwa abu. Netùnùpèeshè mwaba, dîbà, ànu mu tusunsa tukesè cyanààna.

¹⁴³ Dyàmbedi, tudi baakùle bwà cyòci eci. Tudi baakùle bwà Mwonji wà mvinyò ewu, bumpyànyì bwà Nzambi ebu. Mpindyewu, aci cyòci cilelèlè, dîbà adi tudi cyà bushùwà ditàmbà didyànjila kulongolola ku Muci wà mvinyò awu, dîbà adi bìdì bìkèngela bwà Nyumà Mwimpè umwèumwè awu àlwilè munda mwètù. Nènku Yèyè mwenzè nànkù, neÈnzè cintu cìmwècìmwè cyàkenzelàYe ku Yèyè aci, bwalu Yèyè ke Mwonji wà mvinyò. Twètù tudi matàmbà. Nènku piikalà...Mwoyi ùdì mu Mwonji wà mvinyò awu ùdì nè cyà kwikala mu ditàmbà, bwà kuvwija ditàmbà adi nè mwoyi. Piikalàci citwàla dishiilangana ku cidi Muci wà mvinyò awu mupàtùle, dîbà adi cidi mwonji wà mvinyò mubì. Ke cìndì nteeta kwamba ncyòci aci. Cidi nè cyà kwikala Mwoyi wùmwèwùmwè awu.

¹⁴⁴ Mpindyewu, mbanganyì bàdì nè twartà twà disambila? Elà cyanza cyèbè muulu!...?. Èyo. Mbibangile penyi's, kuumukila ku ùmwè too nè ku makùmi àtaanu, anyì ùmwè too nè ku lukàmà? Anyì, mbanganyì bàdì bamanyè? Kùdikù—kùdikù twartà twà disambila kumpàlà kwà...Indilaayi. Mpindyewu, nganyì udi nè nombà ùmwè? Kùdikù kartà kàà disambila nombà ùmwè munda emu anyì? Udi pù anyì? Èè, Mbibangile penyi, dîbà adi, makùmi àtaanu? [Mwanèètù wa balùme kampàndà ùdì

wàmba nè: “Ûmwè too nè ku makùmi àtaanu.”—Muf.] Kaa, kaa, kaaba aka, umwe too nè ku makùmi àtaanu. Èyo.

Imàna ànu mwaba awu, wamònu’s, nombà ùmwè.

Nombà ibìdì. Nombà ibìdì. Èyo, imàna ànu mwaba awu.

¹⁴⁵ Nombà isàtù, kartà kàa disambila nombà isàtù. Ûdi mu nzùbu emu anyi? Ûdi mwà kujuukila kuulu anyi? Mfwilaayikù luse. Bàdi naatù, mu myaba yònsò. Nombà isàtù, udikù mwà kulwa apa anyi, inàbànzà?

¹⁴⁶ Nombà inaayi. Nganyì udi nè kartà kàa disambila kàa nombà inaayi? Nda buludì kwàka, inàbànzà. Nombà inaayi, ki ùmvwa mumòne anyi? Ki yèyè awu anyi. . . Nganyì udi nè nombà inaayi? Èyo.

Nombà itaanu, nombà isambòmbò, mwandamutekète, mwandamukùlù. Mwandamukùlù, nombà mwandamukùlù.

¹⁴⁷ Citèemà. Mpindyewu indilaayi apa. Nombà mwandamukùlù, citèemà. Bàmwè bantu mbapàtùke, bìdi mwà kwikala, mbafwànyine kwikala umwe wa ku yòyi ayi. Nombà citèemà.

¹⁴⁸ Nombà dikùmi, nombà dikùmi nè ùmwè, nombà dikùmi nè ibìdì, dikùmi nè isàtù, dikùmi nè inaayi, dikùmi nè itaanu.

¹⁴⁹ Yòyò! Nkumpangike bànaayi anyi bàtaanu. Nàku netùfikeku. Pàmwàpa mbapàtùke pambèlu. Muntu yèyè mubwele, Mwanèètù Taylor, ùtàngilè ùmonè ní bàdi nè twartà twà disambila kuntwaku. Ûbàbwejè mu mulongo, bu wèwè mwà kuswà. Bu bòbò nànsha mwà kwikala bapàtùke bayè too nè mu mwaba kampàndà lwà mu ndekeelu mwàmwa.

¹⁵⁰ Mpindyewu nèndombè kaneemu kààbùngì menemene, nènku ikàlaayi ànu nè kaneemu kààbùngì.

¹⁵¹ Mbanganyì mwab’ewu bàdi bàsaamà kàdi kabàyi nè kartà kàa disambila? Nudikù mwà kwela byanza byènù muulu kwamba nè: “Ndi nsaama nè mu lukèngelu nè nciyi nè kartà kàa disambila to.” Èyo. Mpindyewu tàngilà mu nùku ewu nè itàbùùjà. Èyo.

Mpindyewu, Mwanèètù Teddy, bitùùlùbitùùlù menemene.

¹⁵² Mpindyewu, bantu aba bòbò kabàyi babwelè to, tudi mwà kutùngunuka nè mulongo wà babèèdì, mwaba kampàndà mukwàbò. Kàdi netwìndilè, bwà kubàpèsha kaaba.

¹⁵³ Mpindyewu, ke dîbà edi dîdì bintu byònsò bìndì mwâmbè nè cyà kujaadikiibwa nè mbilelèlè anyi byà mafi. Bible kèna wàmbakù nè: “Nùkenketè bintu byònsò. Nè nùshaalè bakwàtè bikolè ku cìdì cìmpè anyi”? Mpindyewu bu. . . Yesù, mwikàle Mwonji wà mvinyò wà Nzambì, mujingile Nkwasa wa butùmbi wa Nzambì, è kutwàdilaYè Èkèleeziyà Mwoyi wà Cyendèlèlèlè, nè twètù tudi matàmbà à Mwonji wà mvinyò awu. Nwamònu anyi?

154 Wàkakùna Izalèlèlè mu Pàlèstinà. Kabyàkakùmbanàkù to. Bààkalwa bu mùdì...Mamuma àbò àkafùbidila bu mùdì byowelawela amu. Byàkatòloka bufùku bùmwe, kàdi kufùbidilabi, bìleeja nè kabìvwa bimpè to. Kabìvwa nè cyà “Cyendèlèlèlè nànsha.”

155 Kàdi mamuma àdì mu Kilistò Yesù neàshaalè kashidi. Bidi nè cyà kwikala nànkù. Nènku piikalà Nyumà Wendè, uvwa pambidi Pèndè awu, muciiakàlè ànu nè mwoyi leelù ewu, kî ndingumba dyà cyowelawela to. N’Nzambi udi nè mwoyi udi utwàla Mwoyi wùmewèwùmwe wàkatwàlèYe awu. Nudi nwitabuuja nànkù anyi?

156 Mpindyewu, kadyàkudyùja ànu pàtupu’ nè kwamba nè: “Kaa, bintu abi bivwa bwà ditùkù dikwàbò to. Kaa, Ncintu kampàndà cyà mùshindù *ewu*.” Dyòdì dyenze nànkù, ikàlè mujoomònyìibwe, mu dindà emu.

157 Ncilelèlè. M’Mwoyi mulelèlè. N’Kilistò mulelèlè. Mpindyewu udi nè diitabuuja nè witabuuja, nènku kwèdiku mpatà nànsha mikesè to bwà nè Nzambi ùdi kaaba aka bwà kwondopa babèèdì.

158 Mpindyewu, nwènù bàdì kanùyì nè kartà kàà disambila abu, nwènù mwà kusambila nè kwitabuuja ànu nè mwoyi wènù wònsò, dībà adi—dībà adi Nzambi neà—Nzambi neànùpèeshè bintu binùdì nulòmba abi. Mbanganyì bàdì biitabuuja nànkù mpindyewu?

159 Mpindyewu ndi muswè kunùkonkakù cikwàbò cintu. Bu Nzambi mwà kwenzaku nànkù...Mpindyewu twànjàayibi kumòna ní kùdikù muntu mu mulongo emu ùndì mumanyè. Kakwèna muntu nànsha umwe kaaba aka ùndiku mumanyè to.

160 Èyowà’s, Mwanèètù wa bakàjì Logston. Kî ngwèwè Mwanèètù wa bakàjì Logston anyi? Mmwòmò anyi? [Mwanèètù wa bakàjì Logston ùdi wàmba nè: “Ncyèna mu mulongo amu to.”—Muf.] Kaa, wèwè kwèna mu mulongo to. Wàmfwilakù—wàmfwilakù luse.

161 Ndi ngèlèla meeji nè bantu bònsò abu mbeenyi kùndì mpindyewu. Ncyà—ncyà bushùwà anyi? Ncyèna mumanyè kantu nànsha kàmwe pa bwalu bwènù to. Elàayi byanza byènù muulu piikalabi nè ncyà bushùwà. Mwaba awu, mmunyi mwènzèkì aci’s? Ànu mwènzèkìci mwine’s, ànu ku dipweka nè kwelesha mulongo wà babèèdì nè twartà twà disambila, muntu yònsò udi naatù dijinga mwab’ewu, nè kùdì mene aba bàvwà pàmwàpa... kùdì bàdì bapangike? Mmunyi mùdici cyenzèka’s? Mulongo mujimà kuntwaku, muntu nànsha umwe kaaba aka mpindyewu mu tabernacle emu. Ncyèna ngèlèla meeji nè aci ncyenzèkekù kwònsò eku to.

162 Mpindyewu nwènù bàdì kanùyì nè kartà kàà disambila abu. Kùvwà mukàjì kampàndà wakadifinda mu musùmbà wà bantu amu, musangu kampàndà, nè kulengayè luzemba lwà ciwàlù

Cyèndè, bwalu wàkamba nè: “Ndi ngiitabuuja. Cidi nsaserdòsè wàmba nànsha ciikàlè cinyi, anyi ní nganyi mukwàbò yònsò. Mémè ndi muMwitàbùùje. Mémè ànu mwà kulenga civwàlù Cyèndè, nèngòndopiibwè.” Nudi bamanyè bwalu-bulonda abu anyi? Ke kulengayè civwàlù Cyèndè. Ke kukùdimukaYè kùdiye è kumwambila nè disaamà dyèndè dyà mashi àlwa munda adi dyàkiimanyiiibwa. Diitabuuja dyèndè dyàkamusàngaja. Nudi bamanyè nè aci m’Bulelèlè anyi?

¹⁶³ Èè, Yèyè ùdi Mwakwidi Munène umwèumwè awu mu dindà emu. Udi pa Nkwasa wa butùmbi wa Nzambi. Dìyì Dyèndè, ke Matàmbà Èndè ngòwò awu, Dìyì dyà Nzambi dipàyika ku Nkwasa wa butùmbi wa Nzambi kumpàlà kwà difùkà dyà dyulu nè buloba. Nudi nuciitabuuja anyi? Cyàkatwàla Mwoyi, Kilistò Yesù awu. Ku Mwoyi awu, kutwàlaci matàmbà, cidi citwàla Mwoyi wùmfwèwùmfwè wùdiWu awu wùfùmina ku Nkwasa wa butùmbi. Ncyà bushùwà anyi? Pashùishe Yèyè mmusòmbe, ngiikàdìlù wa miji Yèndè leelù ewu, ùdi ku dyàbalumè dyà Mutàmbe bunène mu Dyulu, bwà kupàtula Mwoyi wùmfwèwùmfwè awu mu Èkèleeziyà Wèndè. Yèyè m’Mwakwidi Munène udi mwà kulengiibwa kùdi dyumvwa dyà mateketa ètù. Aci’s ncilelèlè, kí mmwòmò anyi? Mpindyewu udi witabuuja aci nè mwoyi wèbè wònsò’s.

¹⁶⁴ Yèyè mucyènzè, mbanganyi bàà kunùdi nwènù babèèdi bàdi kuntwaku biikalà mwà kuciitaba? Nwènù bònsò anyi? Mpindyewu, Teddy. . .

¹⁶⁵ Mpindyewu mukàjì kampàndà nyèwù mwimàne kaaba aka, uvwa mwele cyanza cyèndè kuulu nè ncivwa mumumanyè to. Nè Nzambi mmumanyè nànkù, bwà ku dyànyì pàànyì dimanya, ncitukù mwànji kumumòna kwònsò eku to.

¹⁶⁶ Ùdi mwà kwikala mene wa mu cimenga eci. Ncyèna mumanyè to. Nciyèna kàbìdì mumanyè cyàbisàtù cimwè cyà bantu to. Bantu bapyabàpyà mbabwelemù. Mvwa nè ciibidilu cyà kupweka mu cimenga, mvwa—mvwa mumanyè muntu nè muntu. Mpindyewu, bidi ànu bu nè, ncyèna mumanyè muntu nànsha umwe to, bwalu bààbùngì mbalwè munwemu.

¹⁶⁷ Ncyèna mumanyè mukàjì ewu to. Yèyè kí mmummanyè to. Kàdi bu Mwoyi wùmfwèwùmfwè wùvwà mu Mwónji wà mvinyò awu, ùvwà mulayè nè ditàmbà nedikwamè mulongo wùmfwèwùmfwè wùvwà. . . Mwoyi wùmfwèwùmfwè wàkatwàla Mwónji wà mvinyò awu. “Ewu udi ungiitabuuja Mémè, byenzedi biNdi ngenza yèyè neàbyènzè pèndè.” Aci m’Mufundu anyi? Yone Munsantu 14.8. Eyo.

¹⁶⁸ Mpindyewu, piikalàbi nè mudimu wàkenzàYe, kuyiikila nè mukàjì wa ku ciinà cyà màyi awu nè kumwambila cintu kampàndà civwà cintu cisokoka mu nsòmbelu wèndè; bu Nyumà Mwimpè umwèumwè awu, mu dindà emu, mwà kukwàcila mudimu mu èkèleeziyà emu, nè kwakwila kùndì, nè kwambila

mukàjì ewu cintu kampàndà cidiye mulwìlè kaaba aka, anyi cintu kampàndà cidi mu nsòmbelu wendè, anyi cintu kampàndà cikwàbò cidiye mumanyè nè ncyèna mumanyè kantu nànsha kàmwè pa cyòci aci to. Bwalu, mémè nciyi mumumanyè to, èè, ncyèna—ncyèna mumanyè kantu nànsha kàmwè pa bwalu bwendè to. Yèyè mmwimàne ànu kaaba aka.

¹⁶⁹ Kàdi bu Nyumà Mwímpè awu mwà kwenza nànkù, kabiyi mwà kupangila to. Ke Dìyi dyà Nzambi edi, dicilayè's. S'ki twètù bònsò bàbìdì aba, twamba, twètù bònsò bàbìdì nè: "Kacya katùtukù bânji kumanyangana muntu nè mukwèndè to, kacya katùtukù bânji kumònanangana muntu nè mukwèndè to." Bu Nyumà Mwímpè mwà kubuulula aci, dîbà adi, Mwoyi wùmwèwùmwè wùvwà mu ditàmbà adi awu wùcidi ànu nè mwoyi, anyi mu Mwonji wà mvinyò amu's wè, munkaci mwà kupuuyakeena mu ditàmbà amu. Mukalenge Nzambi àcìfilèku.

¹⁷⁰ Mpindyewu, mu Dîna dyà Yesù Kilistò, ndi ngàngata nyumà yònsò udi munda emu ku bukòntononyi bwànyì, bwà bwalu bwà Bukalenge bwà Nzambi. Mpindyewu, ikàlaayi mpindyewu ànu nè kaneemu kàa menemene, muntu nè muntu.

¹⁷¹ Tudi tutwilangana bwà musangu wètù wà kumpàlà, muntu mulùme nè mukàjì, ncintu kampànda bu mwàkadibi mu Mifundu's. Nzambi ùdi munkaci mwà kwanyishila cyòci eci, pàmwàpa, bwà nè bantu, mu Ditùkù dyà Cilumbulwidi, bààfwànyina kumanya nè, kabèèna nè pàà kubingila to. Bu muntu mwà kuumuka mu dindà emu, kàyi mukùnyìibwe mu Kilistò to, kàyi mumanyè bwímpè Bwèndè nè luse Lwèndè to; kàyi naabì kwàka to, mmufwànyine kwikala nè mpungà mukesè menemene, mündi mwà kudifwànyikijila, ku Ditùkù dyà Cilumbulwidi. Pàdi Dìyi diyishìibwe, nè pashìishe pìikalà Nyumà Wèndè...

¹⁷² Nwamònu's, ncintu cìmwè, bwà kuyiisha cintu kampàndà. Yèyè mwikàle Nzambi wa maalu-malonda, dîbà adi aci's ke cyàkenzàYe ànu mu maalu-malonda. Kàdi pìikalàYe cyà bushùwà Mwonji wà mvinyò, nè twètù biikàle matàmbà, dîbà adi ditàmbà adi didi ànu citùpà cyàwù menemene. Mwoyi ùdi mu Mwonji wà mvinyò awu wùdi munkaci mwà kupuuyakeena ànu mu ditàmbà, nwamònu's, nànkù nebikeyengele bwà kupàtuladi cintu cìmwècìmwè aci. Yèyè ngudi mulayè nànkù. "Ewu udi ungiitabuuja Mémè, byenzedi bìNdi ngènta neàbyènzè pèndè."

¹⁷³ Mpindyewu, pawikalà usaama, nènku, nè—nè ncyèna mumanyè to. Kàdi wèwè usaama, mémè ncyèna mufwànyine kukwondopa to, bwalu aci Yèyè ùkaadi mumanè kwenza.

¹⁷⁴ Kàdi mbifwànyine kwenzeka nè Bwikadi Bwèndè kaaba aka bùdi mwà kukufikisha ku dyumvwa ànu menemene nè Yèyè ùdi kaaba aka. Dîbà adi aci ncifwànyine kukolesha diitabuuja dyèbè bwà kuciitaba. Nwamònu anyi? Ke mùshindù awu wùvwàbi mwà kwenzela batèeleji's. Cìdici cìfwànyine kwenzela mukàjì ewu

aci, ncifwànyìne kwenzela muntu nè muntu yònsò wa kunùdi. Mpindyewu wêwè itàbùùjà ànu aci.

¹⁷⁵ Bwalu: “Wàkatàpiibwa mpùtā bwā dishipa dyètù dyā mikenji. Ku mibùndābùndā Yèndè twākamana kondopiibwa.” Twākamana. Kale wāwa kùkaadi ntàntā mule, kùkaadi bidimu binunu bibìdi, lupādu nè dyondopa byākalwa dībā adi.

¹⁷⁶ Mpindyewu wêwè udi wamba nè: “Cyùdi wākwila ncinyi’s, Mwanèètù Branham?” Ndi mmòna cìikalā Nyumā Mwîmpè mwā kwamba. Ncyēna mumumanyè to.

¹⁷⁷ Nè mwaba mukolaakòlààyi mutāmbe wùntùku mupetè bwā kwenza masangisha, s’ngapa mene. Bwalu, aci’s ke cyākamba Kilistò nè: “Mupròfetā mu ditùngā dyābò sungasunga, munkaci mwā bàākwbò sungasunga.” Nwacimònu anyi? “Wākabwela kùdi Bèndè sungasunga, kàdi Kāvwa mwā kwenza bintu byābùngi to.” Wākuumuka kuya. Mpindyewu, kī mbwā kasumbu kakesè aka to. Kī nnāku to. Èkèleeziyā wanyi, mbannangè nè bangiitābùùjè. Kàdi’s mbeena pambèlu. Nè Dìyi dyā Nzambi dyāmbè. Dìdi dyāmba nāku.

¹⁷⁸ Kàdi ndi—ndi munkaci mwā kwindila ànu kakesè, bwā kumòna Nyumā wa Nzambi ní wāndaabakù bwā kujandula. Mpindyewu, yēyè ùdi nyumā nè yēyè ùdi mubidi. Dīngā ditùkù nyumā nèumuke, nè dībā adi mubidi newùbolè. Nyumā ùyaaya kùdi Nzambi Wākamufila awu. Nyumā nyēyè ewu, pèndè, mwimāne kaaba aka, kàdi mmuleejìbwe mu mubidi wā musunya. Mpindyewu pìikalābi nè nyumā eyi mmiswikila mu Mwonji wā mvinyò awu, neyitwalè. . .

¹⁷⁹ Cìvwa ncinyi aci? Pààkalwā nyumā kampàndā kumpālā kwā Yesù, uvwa nè ncintu kampàndā cibi, Nyumā uvwa munda Mwèndè awu wākacibuulula. Nwamònu anyi? Nēnku mukājì awu, pàākacibuululāYe, wākaciitaba, nè kwamba nè: “Wêwè udi nè cyā kwikala ànu Maasiyā awu. Tudi bamanyè nè pààlwāYe, Yēyè nèatwāmbilè maalu aa.”

¹⁸⁰ Peetèlò, pààkalwāye, kaa, s’ùvwa ànu bu wākadikonka cìvwa Andèlè wākula aci’s. Ùvwa wāmba nè: “Yēyè’s ke Maasiyā awu.” Kàdi mmwenzè ànu ùfika kùdiYe, Yēyè kwamba nè: “Dīnā dyèbè n’Simonā. Udi mwānā wa Yona.” Aci cìvwa cikumbāne bwèndè yēyè. Nwamònu anyi? Ùvwa mumanyè nè Yēyè kāvwa mumanyè nè yēyè ùvwa nganyì to.

¹⁸¹ Kàdi Yēyè mmumanyè nè wêwè udi nganyì. Mēmè ncyēna mumanyè nè wêwè udi nganyì to, kàdi Yēyè ngudi mumanyè. Ncyēna mumanyè kantu nānsa kāmwe bwā bwalu bwèbè to, kàdi Yēyè ngudi mukumanyè.

Mpindyewu, ke Yēyè ewu’s. Mpindyewu Nyumā wa Nzambi ùdi ku cyoshelu eku.

¹⁸² S’ki Cyòci aci. S’udi mumanyè nè cintu kampàndā ncyenzèke. Udi kaaba aka mbwā disaamā dyā dibinduluka. Ncyā

bushùwà. Udi kàbìdì nè binyòka. Aci's mbulelèlà. [Mwanèètù wa bakàjì awu ùdì wàmba nè: "Bidi nànkù."—Muf.] Nudi nwitabuuja anyi? Kacya bandela ncìtu mwânjì kumòna mukàjì ewu to.

¹⁸³ Mpindyewu, aci kî ncyà kalolo anyi, cyà bushùwà aci... Ndi mumanyè nè nudi benzèjìibwe bwà kuCyùmvwa. Mémè ndi munkàci mwà kuCitàngila. Nwamònu anyi? Byenze ànu bu divwayila dyà kalolo's.

¹⁸⁴ To, ndi mmòna muntu ùlwa kaaba aka. Mmwanèènù wa balùme. Udi mumusambidile bikolè be. Ndi mmòna wa bidimu bishààdile, nsongààlùmè wa bidimu bishààdile. Ùdì nè cyà kwikala mwambi. Mmwanèèbè wa balùme. Ùdì nè lutàtù lwà nyumà. Udi mulwè ntàntà mule, bwà kufika kaaba aka. Udi mufùmine ku Sud, wenda ulwa mu njila ewu. Udi wa ku Tennessee. Udi Mandamu Tabor. Alùkilà. Udi nè dilòmbà dyèbè. Nzambi ùdì ùkupèèshadì. Bu...

¹⁸⁵ Mpindyewu, kacya ncìtukù mulenge mukàjì awu to. Nyumà Mwîmpè ngudi mwenzè nànkù. Mpindyewu, ke mùshindù wùmfwèwùmfwè awu...Ke mùshindù wùmfwèwùmfwè awu wàkenzekàbi mu Bible anyi? Mukàjì awu wàkamba nè: "Wèwè udi nè cyà kwikala Maasiyà." Mpindyewu, aci kacyèna cyùmvwija nè *mémè* ndi Maasiyà to. Aci cidi cyùmvwija nè Nyumà wa Maasiyà ùdì kaaba aka. Tudi ànu bantu balùme nè bakàjì. N'Nyumà wa Maasiyà.

¹⁸⁶ Mpindyewu, nwènù Cyàkidilaayi, nujoomonyiibwè, mu bupidyà bwà kale abu, nè nukùnyiibwè ànu ku luseke Lwèndè mene, nwamònu's. Mpindyewu juukilà kuulu wàmbe nè: "Mukalenge Yesù, Wèwè bu Mwànà wa Nzambi, Mwakwidi Munène awu. Mwanèètù Branham's wáfumu ku dyamba nè Wèwè udi musòmbe mu Bunène mu Dyulu mwàmwa. Wèwè uvwa mudyànjila kulongolola kumpàlà kwà difùkà dyà dyulu nè buloba, Wàkashipiibwa, bwà kutwàla bipeta ebi; nè, mèmè, mwena kwitabuuja wa mushiikile mun njila, nteeta bwà kwitabuuja, ngàmòna mwà kwenjiibwa bwà kwitabuuja mu kaabujimà. Enzàku ndengè civwàlù Cyèbè. Mwenzèjèku bwà kwakulayè naanyi." Wèwè udi...

¹⁸⁷ Nwènù mu batèèleji amu, ambààyi cintu cìmwècìmwè aci. "Bwalu Wèwè mwikàle umwèumwè awu makèèlèlà, leelù, too nè kashidi, Wèwè—Wèwè—Wèwè ndekèlè nKulengè nè diitabuuja dyànyì, kutèeka ku luseke meeji ònsò à dibènga kwitabuuja awu. Ndekèlè nKulengè."

¹⁸⁸ Ndi ngèèla meeji nè uvwa mwèlè cyaanza cyèbè muulu, wèwè pèèbè, nè katwèna bamanyàngàne to. [Mwanèètù wa bakàjì awu ùdì wàmba nè: "Ndi mwèlè."—Muf.] Èyo. Mpindyewu, bu Mukalenge Yesù mwà kunsokolwela, cintu kampàndà cidi—cidi cikutacisha, anyi cintu kampàndà cyà mùshindù kampàndà, udi mufwànyine kwitabuuja nè—nè—nè nshinga wa Disungila

ewu, wa nè Èkèleeziyà bulelèlè mmukùnyìibwe mu Nzambi. Yesù wákamba nè: “Mu ditùkù adi, nenùmanyè nè Mémè ndi munda mwà Taatù, Taatù ùdi munda Mwànyì; nè Mémè munda mwènù, nè nwènù munda Mwànyì.” Nwamònu anyi? M’Mwoyi wà Nzambi awu wùtuucila nkòkà mu Dìnà dyà Yesù Kilistò, wùpweka buludì mu Èkèleeziyà, nwamònu’s, wùtùvwija umwe. Tudi matàmbà. Tudi baleeji Bendè bàà mpàla.

¹⁸⁹ Wèwè mwiṭàbùùje aci, dĩaamà dyà makàsà adi ndifwànyine kukuumuka. Udi mufwànyine kuciṭabuuja anyi? [Mwanèètù wa bakàji awu ùdi wàmba nè: “Ndi ngiṭabuuja. Ndi ngiṭabuuja.”—Muf.] Èyo. Udi mwà kuciṭeta. Nè bàyeebè mwaba awu mmufwànyine kwondopiibwa, yèyè pèndè. Udi wiṭabuuja nè mmufwànyine kwondopiibwa, ku kààmunda anyi? [“Èyowà.”] Wèwè, mukalenge, udi wiṭabuuja nè udi mufwànyine kwondopiibwa anyi? [Mwanèètù wa balùme awu ùdi wàmba nè: “Amen.”] Uh-huh. Udi wiṭabuuja anyi? Udi nè mwànà wa bakàji, kàbìdì. Yèyè ùdi nè nyumà kampàndà wa lutàtù kampàndà lwà mu nyumà. Udi mufùmine ku Nord, ulwa mu nùnkù ewu. Udi upweka nè cibeeba. Udi wa mu Austin. Dìnà dyèbè m’Màndàm White. Aci’s ng’EMU MMUḐÌ MUKALENGE WÀMBA. [“Kaa!”] Alùkilà wiṭabuuje mpindyewu, nè wòndopiibwè, nè pashìishe ùsangalè. Nzambi àkupèèshèku dijinga dyà mwoyi wèbè.

“Bu wèwè mwà kwitabuuja, bintu byònsò bìdi mwà kwenzeka.”

¹⁹⁰ Mwoyi wà Mwoyi wà Kilistò, mu ditàmbà. Ditàmbà kî m’Branham Tabernacle to. Ditàmbà kî ng’William Branham to. Ditàmbà ngwèwè yònsò wajoomonyiibwa ku bupidyà bwèbè, nè kukunyiibwa mu Yèyè.

¹⁹¹ Ndi ngèlè meeji nè uvwa mwelè cyanza cyèbè muulu, wèwè pèèbè, nè katùvwa bamanyàngàne neebè to. Ncyèna mukumanyè to. Nzambi ngudi bushùwà mukumanyè. Kwèna mulwè apa bwèbè wèwè mwinè to. Mbwa mwànà awu. Ndi mmòna Bukènkè bulembèlè kumutù kwà mwànà awu. Bu Nzambi mwà kunsokolwela cìdì cìtácisha mwanèèbè awu aci, newiṭabuuje nè ndi mupròfetà Wendè, nè wiṭabuuja nè ndi nkwambila bulelèlè anyi? Udi mufwànyine kwitabuuja. Mwànà awu ùdi nè dĩaamà dyà mwoyi. Ncintu kampàndà bu mùdì sùpapè amu, mwákamba ngàngabukà. Ncicipicishila ku diteeta. Mmuswè kucitùma ku cyondopelu cisùngùlùke dyàkàmwè. Ncyà bushùwà. Udi wa mùnwemu mu Jeffersonville, lwà mu mùsèèsù emu, Mùsèèsù wà Fulton. Kàdi aci’s ncyà bushùwà. Nènkù dìnà dyèbè dìdì Mandamu Burkhart, Irene Burkhart. Alùkilà, nè itàbùùjà bwà mwànà awu, yèyè neàsàngalè.

¹⁹² “Bu wèwè mwà kwitabuuja, bintu byònsò bìdi mwà kwenzeka.” Bu wèwè ànu mwà kwitabuuja cyanààà’s!

193 Mukàjì udi musòmbè apa ewu nè disaamà dyà dibìnduluka adi. Èyowà. Dìpwe mwoyi. Udi walukila kwèbè kumbèlu, neùmvwè bîmpè mpindyewu.

“Bu wêwè mwà kwitabuuja!”

194 Wêwè udi nè cyanza cyela muulu mùshindù ewu, udi nè disaamà dyà nyimà. Udi witabuuja nè Nzambi neàkusàngaje anyi? Udi witabuuja, uciitaba anyi? Nànkù alùkilaaku kwèbè kumbèlu ùsangalè. Yesù Kilistò ùdi ùkusàngaja.

195 Dyèbè ndyà toonyi. Pa nànkù, nda mutàngile kumpalà, wêwè udi nè dyèbè, wêwè pèèbè, mukalenge. Nzambi àkubènèshè.

Ikàlà nè diitabuuja mu Nzambi. Kwèdi mpatà to.

196 Mukàjì wa bafiike. Bàdikù bàbìdì bajimà. Ànu lwà paanyimà pààpa. Cyùjà pa muminu, mu muminu. Itàbùùjà nè mwoyi wèbè wònsò. Udi uciitabuuja anyi, inàbànzà? Kafulu kakesè kàà cijèngù bu nànkù awu, mwaba awu. Udi witabuuja anyi? Elà cyanza muulu. Èyo. Alùkilaaku kwèbè kumbèlu; necyumuke.

197 Kùdi mukàjì mutekète kutàmba ewu. Ncyèna mukumanyè to. Nzambi mmukumanyè bulelèlè. Udi witabuuja nè Yèyè ùdi mwà kukusàngaja anyi? [Mwanèètù wa bakàjì awu ùdi wàmba nè: “Èyowà.”—Muf.] Èè, alùkilà ku New Albany, Mandàmwànzèlà Pearl Allen, nè ùsangalè. Yesù Kilistò wàkwondòpù. Ndààku, mwikàle uciitabuuja, udi mwà kusàngala.

198 Ikàlà nè diitabuuja mu Nzambi. Udi witabuuja nè mwoyi wèbè wònsò anyi? Mpindyewu, kabyèna...Kaa, kùdi bintu byònsò ànu munkaci mwà kwenzeka, lwà pa...Bu wêwè ànu mwà kuciitabuuja's, mulundà wanyì!

199 Wetwàwu, mukalenge? Udi witabuuja Yesù Kilistò Mwànà wa Nzambi anyi? Udi witabuuja nè mèmè ndi mupròfetà Wendè anyi? [Mwanèètù wa balùme awu ùdi wàmba nè: “Ndi ngiitabuuja.”—Muf.] Udi witabuuja nè cìndì mwà kukwambila aci. Udi mufwànyine kumanya bîmpè bitàmbe nè mbulelèlè anyi kî mbulelèlè. Udi witabuuja nè bîndì muiyishè pa bwalu abu, mu dindà emu, m'Bulelèlè anyi? [“Èyowà.”] Udi witabuuja cyà bushùwà. Udi kaaba aka mbwà cintu cîmpè. Udi kaaba aka bwà kulekela ciibidilu kampàndà, ciinè aci, nkunwà kwà mfwankà. Ndi nkumòna wêwè uciitàngila, nè upiisha cintu aci, nè ucyùmusha kùdi. Ncyà bushùwà. Kuteeci...bu wêwè...Tèèleja. Udi dijinga nè disambila bwà mukàjèèbè. Yèyè ùdi nè cintu cyenzè bu cinyinginyingu. Mukalenge Carlock, alùkilà ku Owensboro, mu Kentucky, kùdi mufùmine aku. Kùlengi mukwàbò mucì wà mfwanka to. Yesù Kilistò ùdi ùkusàngaja. Ndààku, mu Dìnà dyà Mukalenge, nè wòndopiibwè.

Udi witabuuja anyi?

200 Mpindyewu tàngilàayi. Muntu udi ulwa kaaba aka ewu, tentèkà ànu cyanza cyèbè pa cyànyì apa, mukalenge, kaaba aka.

Nyimà uvwa ukusaama awu wáyì. Alùkìlà wêwè ànu paanyimà apu, usàkidila Nzambi. Amen.

201 Udi muswè kuya kadyà didyà dyèbè dyà mundaamuunya anyi? Disaamà dyà cifu adi nedikuumuke wêwè mucitabùùje. Udi uciitabuuja anyi? Kwàta njila ndààku. Nzambi àtumbè, nè ambà nè: “Twasàkidila, Mukalenge.”

202 Mbanganyi bàdi biitabuuja nè mwoyi wènu wònsò?

203 Nzambi àkubènéshè. Mùshindù awu, kàbidì, udi mwà kuya nè kutùmbisha Mukalenge. Kwamba nè: “Twasàkidila, Mukalenge.”

204 Udi nè lutàtù lùdì naalù bantu bààbùngì mwab’ewu, mijilu yà mutù mibìndùlùke, dìdì dìlubakaja mwoyi wèbè, dìsaamà dyà mwoyi.

205 Nwènu biitabùùje nè mwoyi wènu wònsò, nwènu abu... Mbanganyi bàdi ne mwoyi mubìndùlùke nè bikwàbò? Mpindyewu elàayi byanza byènu muulu mùshindù ewu. Tàngilà kùnweku. Mmunyì mùdiku mwà kubàbùkila? Nwamònu anyi?

206 Udi witabuuja nè mwoyi wèbè wònsò anyi? Udi witabuuja, wêwè pèèbè anyi? Èyo. Ndààku wikalè mwondòpiibwe mu Dìna dyà Yesù Kilistò. Kwèdikù mpatà nànsha mikesè to, kàdi itàbùùjà mu cidi cikwambila aci nè m’Bulelèlà. Itàbùùjà nè udi mwondòpiibwe. Neupetè cyùdi ulòmba aci.

207 Nwènu bakwàbò nudi nwenza cintu cìmwècìmwè aci. Mbanganyi bakwàbò bàà kunùdì mwaba ewu bàdi naaci? Èyo, mukalenge. Mbanganyi kunùdì aku bàdi mu lukèngelu lwa Nzambi? Elàayi byanza byènu muulu. Nè nwambè... .

208 Tàngilàayi. Umvwaayi eci. Ncyèna mwà kwondopa muntu nànsha umwe to. Mémè ndi muntu. Bu nè Kilistò ùvwa mwimàne kaaba aka, Yèyè kàvwa mwà kwondopa nànsha umwe wa kunùdì to. Ùvwa mwadije ndongamu kampàndà panshi, nè ndongamu awu ùdi nè udi witabuuja nè Yèyè wàkakufwìla, udi mwà kwondopiibwa ku cyòci aci. Ke mùshindù wùmwèpelè ngwòwò awu. Ndiitabuuja didi dyondopa. Diitabuuja’s! Ùdi witabuuja nè Kilistò wàkakufucila mushinga. Mbanganyi bàdi buumvwa aci mpindyewu? Èyo. Mbanganyi bàdi biitaba aci? Èyo.

209 Patùdì tusambila apa, tentèkèlàngànaayi byanza muntu nè mukwèndè. Tentèkèlàngànaayi byanza muntu nè mukwèndè, muntu nè muntu sambilaayi.

210 Mpindyewu udi mwà kuya ku nkwasà webè, mwanèètù wa bakàjì. Nzambi àkubènéshè mpindyewu. Ikàlà musàngàlè...?..Èyowà. Aci’s ncyà bushùwà. Ndisaamà dyà dibìndùluka, kàdi nedì—nedikuumuke. Tùlùkààku kuntwaku mpindyewu, ùmòne ní cidi...Udi ubanga kudyùmvwa mùshindù mushiilàngàne, kì mmwòmò anyi? Nwamònu anyi? Bushùwà’s. Ùvwa mwondòpiibwe, paùvwà mwimàne ànu kaaba aka mene. Nudi numòna mùdiye ùtùlùka bibàndilu dībà adi

kàyi naadi anyi? Nwamònu anyi? Nènkù mpindyewu udi bîmpè. Mpindyewu udi mwà kwalukila kumbèlu, kuumvwa bîmpè. Mukalenge àkubènèshè.

²¹¹ Mpindyewu nè byanza byènu bitentekelangana muntu nè mukwèndè. Nwamònu's, katwèna nè dîbà dyàbùngì to, tukàadi twipacila dîbà nkànkàlà. Nè bàcidi kàbìdì, nè mudimu wà dibàtiiza.

²¹² Cyà bushùwà, cyà bushùwà, bantu wètù, Mwoyi munènè wà Nzambì awu, Nyumà Mwîmpè munène Uvwa kàyi ùpangilakù awu ùleeja nè Yèyè ùdipù, bìleeja nè Mwoyi wùdì wùfùmina ku Nkwasa wa butumbi wa Nzambì awu ùdi munkaci mwà kutuucila mu matàmbà amu, bwà kuleeja Mwoyi. Kanwènaayikù nwitabuuja nànkù anyi? Dîbà adi, to, ncitukù mwondòpe nànsha umwe wa ku bantu bàdì bàlwa kaaba aka aba to. Diitabuuja dyàbò dyàkacyènzà bwalu bààkabàmbila cintu kampàndà cidi bulelèlè. Bu nè wèwè uvwa kaaba aka, nùnkù's nCyènzè cintu cimwècimwè aci.

²¹³ Mpindyewu kunùdì nwènù bàdì aku abu, Yèyè ùdi munkaci mwà kunùbuulwila cinùdì naaci dikèngela. Mpindyewu patùdì tusambila apa, bônso pàmwè, sambilaayi, nwitabuuje nè dîyi dyònsò didi bulelèlè, kàdì nùmonè cidi cyènzeka. Nenwikalè mwà kwondopiibwa. Mpindyewu wèwè sambidilà muntu awu. Kùdisambididì wèwè mwinè to. Sambidilà muntu ùdi mutentèkèle byanza awu. Muntu awu àkusambidilè wèwè. Nusambidilangana muntu nè mukwèndè. Bible ùdi wàmba nùnkù mpindyewu.

²¹⁴ Bible mwinè wákamba nè: “Byenzedi bîNdi ngènzà nenùbyènzè pèènu,” mmwàmbè nùnkù: “Bimanyinu ebi nebìfilè aba bàdì biitabuuja. Bòbò batentèkèle babèèdì byanza, babèèdì nebàsangalè.” Mpindyewu, Nzambì wàkenza mulayi wùmwè, nè ùwùlama, wèwè mukùnyìbwe mu wòwò awu, ku kàlà kwà misùlù yà Màyi, Cidi citwàla Bwikadi bwònsò bwà Nzambì, mulayi wònsò, ànu mu dilamakana neebè. Wèwè udi mucì wùdì mukùna ku kàlà kwà misùlù yà Màyi àmwèpelè. Màyi àmwèpelè awu n’Kilistò, Nyumà Mwîmpè Wendè. Kùdi dyondopa. Kùdi lupàndù. Kùdi disànka. Kùdi mwoyi mule, bupòle, kalolo, lutùlù. Mapà à mishindù yònsò matèèka ànu mu Dìnà òmwèpelè dyà mushinga mukole adi. “Cyònsò cinùdì nulòmba Taatù mu Dìnà Dyànyi, ke cìNgènzà.”

²¹⁵ Mpindyewu sambilà mu Dìnà dyà Yesù, bwà muntu ùdi mutentèkèle byanza awu. Mémè nênsambidile bônso, bwènù nwènù bônso. Nyumà Mwîmpè, udi kaaba aka mpindyewu awu, wòndopèku muntu yònsò.

²¹⁶ Mukalenge, tudi baswè kulòmba bwà musàngèelu Wèbè wùtungunukèkù neetù. Muntu nè muntu mulùme anyì mukàjì ùdi ùsambila mu wèndè mùshindù sungasunga. Mbamòne Nyumà wa Nzambì udi nè mwoyi muvwijìbwe wa cyà

Ndi mwà, ndi muswè, ndi ngiitabuuja
bushùwà;

Ndi mwà, ndi muswè, ndi ngiitabuuja
bushùwà;

Ndi mwà, ndi muswe, ndi ngiitabuuja
bushùwà

Nè Yesù ùdi ùngondopa mpindyewu.

[Katùpà kàà mukàbà wà mēyi munda mutupù—Muf.]...
itàbùùjà nànkù.

²¹⁹ Mwà mwà kukùmbula nzùbu yà bantu, nè bàvwa mwà
kulàmba cyàkudyà cìmpè cyà mundaamuunyà. Bàvwa nè cyà
kunsàbishila dikopo dyà m̄yì à luuyà, nè kunsòmbesha panshì
pabwìpì nè kaamusàbù kakesè kàà mpondà; pààbu nè bintu
bìmpè byà m̄shindù yònsò ku mèèsà. Dìngà ditùkù mēmè
kwambila Mukalenge nè: “Ndi ngiitabuuja. Ndi ngiitabuuja.”
Kaa, ekèlekèlè! Mēmè kupweka nè mùsèèsù nè cyànyì cyakudyà
cikole cya kumpàla civwà cibwelaku mukana mwànyì mu difù,
ngènda ngimba nè:

Ndi mwà, ndi muswè, ndi ngiitabuuja
bushùwà;

Civwa mwà kuteeta kumpàtukila ku mishiku; mvwa mwà
kuciminuna kàbìdì.

Ndi mwà, ndi muswe, ndi ngiitabuuja
bushùwà;

Ndi mwà, ndi muswe, ndi ngiitabuuja
bushùwà

Nè Yesù ùdi ùngondopa mpindyewu.

²²⁰ Èyowà. Aci's nkùkaadi bidimu makùmi àbìdì nè bitaanu.
Yèyè ùkaadi wa cyà bushùwà kùndì kacya ànu piinè apu. Ndi
ànu nè kusàkidila kwàbùngì bwà bwalu abu. Swàkù bwà cìikalè
cintu cimwècimwè aci bwèbè wèwè. Nzambi àkubènèshè.

²²¹ Mpindyewu nebènzè mudimu wà dibàtiiza, ànu mu tusunsa
tukesè cyanààna emu, ngèèla meeji; èyowà, mbwena kwamba
nè, kwòkò kwikàlè bàmwè kaaba aka bwà kubatijiibwa mu
Dìna dyà Mukalenge Yesù Kilistò. Kwòkò bantu bàà m̄shindù
awu, bwà twamòna mwà kutangalaja batèèleji anyì—anyì
kubàlamakù ànu kakesè cyanààna, nudikù mwà kwela byanza
byènu muulu kòkò muntu kampànda udi nè cyà kubatijiibwa mu
Dìna dyà Mukalenge Yesù anyì? Ùmwè, bàbìdì, bàsàtù, bànaayi.
Èyo. Bu bakàjì mwà kuya ku *elu* luseke, nè balùme lwà *eku*, bwà
didilongolola, bu nwènu mwà kuswà. Patùdì twimba musangu
ewu kàbìdì apa, *Ndi*. . . 

59-0920 Kukùna Mwonjì Wà
Mvinyò Nè Mwaba Wà Kuwùkùnyina
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org